

四庫全書

史部

欽定四庫全書

史部

欽定大清會典則例卷九十八

九

詳校官檢討臣劉炘

編修臣程嘉謨覆勘

總校官原任中允臣王燕緒

校對官中書臣袁文邵

謄錄監生臣李逢堯

欽定四庫全書

欽定大清會典則例卷九十八

樂部

一典樂順治初年定凡宮懸大樂皆教坊司奏

之設奉鑾一人

正九品

左右韶舞各一人左右司

樂各一人協同官十有五人俳長二十人色長
十有七人歌工九十八人

宮中行禮燕會用領樂官妻四人領教坊女樂二

十四名於

宮門內序立奏樂○又定凡祠祭之樂皆太常寺
神樂觀司之設提點左右知觀協律郎司樂等
官樂生文武舞生樂舞儀節令協律郎等官教
習每月之三六九日演習於凝禧殿

康熙十二年改今名

○八年奉

旨停止教坊司婦女入宮承應更用內監○十五年

諭祭祀關繫大典必供事人員通曉嫻熟始克肅將誠

敬近見太常寺樂舞生聲容儀節多有未諳嗣後須責令勤加肄習務俾精通不得仍前玩忽欽此○雍正元年覆準除樂戶籍更選精工音樂之人充教坊樂工○七年奏準改教坊司為和聲署○

乾隆七年設樂部凡太常寺神樂觀所司祭祀之樂和聲署掌儀司所司朝會燕饗之樂鑾儀

衛所司鐃歌鼓吹前部大樂

即大罕波

均隸樂部○

欽簡禮部堂官內務府堂官各一人暨各部院堂官

之諳於音律者總理樂部事務○是年奉

旨祭祀

壇

廟總理樂部堂官在御史侍班處侍立大朝日在都御

史侍班處侍立○又

諭

郊

廟朝會鉅典攸關其登歌下管各工必肄業有素方免

臨期舛誤此事非可猝就但及今亦當次第辦理
太常寺樂舞生每月在神樂觀演樂雖有定例再
當於春秋二季令赴掌儀司演習如有不協之處
即為訓導俾律呂均諧用昭誠敬欽此遵

旨議準每年春秋於三月九月赴掌儀司演樂一次
令總理樂部大臣悉心考驗○又議準樂部署
正滿漢各一人署丞滿漢各一人侍從待詔供
奉供用等官無專員均以禮部內務府太常鴻

臚寺官兼充○又議準額設樂工百二十人見
不足額臨期雇覓民間鼓手承充請將見存人
內逐一遴選出身清白通曉音律者仍令承直
外其有鑾儀衛鼓手頭領繫內務府人應移隸
內務府又有內務府人借補民校之六十餘名
應將此項人內一并遴選學習○又議準鼓手
樂工總名為署史而以所司樂器分別其名鐘
曰司鐘磬曰司磬琴曰司琴瑟曰司瑟笙簫壎

麓亦如之○又議準供用官由司鐘司磬司琴
司瑟內選補供奉官由供用官選補供奉官升
署丞署丞升署正侍從待詔為署正署丞之加
銜不作升轉其內務府人有應選執事及考試
繙繹文武生員鄉會試仍準其與選與試如繫
署史與領催同繫供用官與執事人同繫供奉
官與庫掌同繫署正署丞侍從待詔並與主事
同署史及供用官已選庫掌及已中舉人供奉

官升主事及已中進士署正署丞侍從待詔已
升員外郎者均開闕別補餘皆兼銜行走至非
內府佐領內管領下之漢人止於本署升轉升
至署正而止再有勤勞加為侍從待詔再有勤
勞止加級食俸不準升轉別衙門將來如有生
員舉人進士出身之外省漢人因通曉音律而
為本署官者升至署正準與光祿寺署正一例
升轉其員闕應補之人皆總理樂部之堂官會

同內務府總管遴選如署正署丞員闕奏請補授移咨吏部注册署史闕堂官等選補注册侍從待詔供奉供用無定員者仍照前辦理署正署丞見有可以簡用之人若滿員闕則內府佐領內管領下人通曉音律者甚少應設額以待學習得人見在不必補足○又奏準署史冠服有官者各照品級服用無官者仍穿遜衣其署史或有應穿補服之時準照未入流雜職官用

黃鸝補服向來遜衣上花補亦換黃鸝至有頂
帶官員應照內務府鴻臚寺等衙門之例不論
品級均掛素珠侍班委署官與見任同離任不
準掛○八年改神樂觀為神樂所知觀改為知
所○十四年奏準嗣後禮部滿尚書職銜加兼
管樂部太常寺鴻臚寺字樣著為成例○二十
年奏準神樂所改為神樂署提點改為署正知
觀改為署丞品級仍舊以昭畫一

一樂章名順治元年議準

郊

廟樂章累朝各取佳名以明一代之制除漢魏曲名不可枚舉外梁用雅北齊及隋用夏唐用和宋用安金用寧元宗廟用寧郊社用咸前明用和本朝削寇亂以有天下擬改用平字

天壇九奏

地壇八奏

太廟六奏

社稷七奏均用中和韶樂○又題準孟春上旬諏吉
及歲除前一日祖迎

太歲樂均六奏樂章用平字○二年定春秋二仲月
上丁釋奠於

先師樂章六奏用平字○八年定朝

日七奏樂章用曦字夕

月六奏樂章用光字均奏中和韶樂○十一年定

躬耕饗

先農樂章用豐字○康熙五十五年

頒中和韶樂於直省

文廟○雍正二年議準令

闕里司樂選工赴太常寺演習訂正轉相傳授以

達於直省

文廟

詳本條下

○是年

欽定耕耤禾辭及耕耤筵燕樂章○乾隆六年奏準謹

按黃鐘子位天之統也

天壇樂章宜以黃鐘為宮黃鐘下生林鐘林鐘未位地
之統也

地壇樂章宜以林鐘為宮林鐘上生太簇太簇寅位人
之統也

太廟樂章宜以太簇為宮至

社稷壇亦地也亦宜改用林鐘為宮月生於酉酉西
方正位也又秋分夕月建酉之月也

月壇宜改用南呂為宮至

日壇若以日東月西日卯月酉論雖應用夾鐘為宮
但夾鐘陰而日為陽揆以人心屬日之義則亦
宜用太簇為宮

先農壇為農事也宜以姑洗為宮

帝王廟

先師廟祭以春秋則宜春以夾鐘秋以南呂為宮

太歲殿則宜以歲始之律太簇為宮均應將樂章與

字譜逐一覈定俾宮商諧暢○七年遵

旨議準

社稷壇於春秋二仲月上戊日致祭宜春以來鐘為

宮秋以南呂為宮○又奏準禱祀

天神應從

圜丘以黃鐘為宮

地祇應從

方澤以林鐘為宮樂章用豐字○又奏準耜田之樂有

三一祭

先農壇一

親耕時歌三十六禾辭一筵燕時奏雨暘時若五穀
豐登家給人足三章

先農壇樂章繫順治年間舊文已經進

呈改正三十六禾辭無庸別撰惟雨暘時若等三
章原為筵燕而設雍正二年以其文不雅馴而
令改撰乃仿古樂府體為之實不能施於燕樂

又自雍正二年來每年耕藉從未賜燕則此樂

本可不奏乃因齋宮

今名成宮

慶

陞座諸臣慶賀

賜茶及

還宮並無樂章誤將此三章燕飲之詩奏中和韶樂而歌之實為未協請嗣後

慶成宮

陞座及

還宮均用中和韶樂羣臣慶賀時仍用丹陛大樂且

常朝

賜茶時本無奏樂之理應行停止至

賜燕需樂雖停止筵燕之歲多而樂章不可以不具
請將雨暘時若等章照海宇昇平日樂章別行
撰擬但其辭不必太長每篇較海宇昇平日字
數止須四分之一○又奏準

先農壇若遇不行

躬耕之年遣順天府府尹致祭不用本壇樂懸應別
撰羣祀慶神歡曲

皇后不行親蠶之年奏遣內務府奉宸苑太常寺堂
官祭

先蠶樂章亦如之

皇后親蠶遵

旨不用樂懸應別擬樂章比羣祀慶神歡加隆○又
奏準賢良等祠繫本朝臣子祭時槩不用樂至

其他羣祀雖與大祀中祀有差然非天神地祇
即古聖先賢故仍舊用樂但不用樂懸仍奏慶
神歡曲以別於大祀中祀所奏之曲當照導迎
樂例不登歌而止載其辭於書三獻三奏辭譜
皆同再前以祭城隍神議不用樂今按城隍在
地祇從壇仍應用樂○八年

諭向來

先農壇親祭始用中和韶樂遣官則同羣祀之例不

用中和韶樂按

日

月壇中祀雖遣官仍用中和韶樂惟不飲福受胙朕
思國之大事在農

先農壇在中祀之列此次遣親王恭代即著照

日

月壇之例用中和韶樂永著為令欽此○十三年

駕幸山左

躬祭

岱嶽樂章六奏用豐字與祭

地祇同樂人用太常寺樂生自京隨往樂器於闕里
文廟移用○十五年

駕幸中州

躬祭

嵩嶽樂章六奏用豐字與祭

岱宗同○十八年奏準禱祀

社稷樂章七奏用豐字祈雨以夾鐘為宮報祭以南
呂為宮○又奏準禱祀

太歲祈雨報祭樂章均六奏用豐字

一侑舞順治初年定凡

壇

廟祭祀初獻用武舞干戚六十有四亞獻終獻均用文
舞羽籥六十有四引舞旗節四舞皆八侑惟

文廟止用文舞六侑引舞旌節二○乾隆七年議準

大雩禮用舞童十有六人分八列執羽翳為皇
舞○八年具奏武舞干上有字其字止五種而
分八佾必不齊一又多互異必繫年久遺失以
訛傳訛謹撰擬八句恭候

欽定奉

旨改定雨暘時若四海永清倉箱大有八方牧寧奉
三永奠得一為正百神受職萬國來庭

一

卷九十八
壇

廟樂器順治元年定祭祀樂章有九奏有八奏有七奏
有六奏所奏樂器均金鐘十有六玉磬十有六
琴十瑟四排簫二簫十篴十笙十壎二篪六建
鼓一搏拊二祝一敔一司樂章者所執木笏十

○十四年

諭祭祀關國家大典應用樂器尤所以感格神明必精
美完好始足肅將誠悃朕觀各壇所用其中尚有敝

損非朕祇事

天

地

祖宗

社稷及致敬告古帝王聖賢之意爾部即詳行察驗
應加修整者節次開列奏請以便修整更換欽此

康熙五十二年重造各

壇

廟中和韶樂○五十四年改造

圜丘壇金鐘玉磬各十有六○是年樂器告成太常寺

題請載入

典訓奉

旨太常寺為樂器告成請載典訓具奏此樂器原繫明朝所載制度原佳但年久失真不免音律未協之處朕因再為修理並未創造今以制作之功全歸於朕似屬不可大學士九卿詹事科道議奏遵

旨議準前代樂器並未窮究根源釐定矩度今中聲既得損益咸宜若不垂載典冊恐歲久仍復失傳將起造告成年月一并宣付史館○五十五年造

祈穀壇金鐘十有六玉磬十有六

一

壇

廟設樂冬至大祀孟夏常雩祀

卷九十八
天於

圜丘樂部率太常協律郎等設中和韶樂於壇三成階
下金編鐘在東玉編磬在西均十有六懸以筥
簾設建鼓一於鐘懸之次左麾一柷一笙五搏
拊一西嚮右敔一笙五搏拊一東嚮左右執笏
司歌章者各五人立於笙前東西嚮左右分列
琴十瑟四排簫二簫十篴十壎二簨六均北嚮
陳武功文德之舞各八佾於階下引舞旌節四

千戚羽籥各六十有四孟春祈穀於

祈年殿樂部率太常協律郎等設中和韶樂於殿外丹
陛上分左右懸陳武功文德佾舞於樂懸之次
與

圜丘同夏至祭

地於

方澤樂部率太常協律郎等設中和韶樂於壇二成階
下編鐘在西編磬在東建鼓設鐘懸之次左麾

一祝一笙五搏拊一東嚮右啟一笙五搏拊一
西嚮琴瑟簫遂壎篪依數分比均南嚮旌節干
戚羽籥之屬東西分列與

南郊同

太廟時饗大袷均樂部率太常協律郎等設中和韶樂
於殿外階上分左右懸陳佾舞於樂懸之次並
如

郊祀儀春秋二仲月祈報

社稷樂部率太常協律郎等設中和韶樂於

壇下內壝門內分左右懸南嚮陳佾舞於樂懸之次

如

北郊儀春分朝

日樂部率太常協律郎等設中和韶樂及佾舞於

壇下南北分列東嚮秋分夕

月樂部率太常協律郎等設樂懸佾舞西嚮仲春吉

亥饗

卷九十八
先農樂部率太常協律郎等設中和韶樂及佾舞於壇下東西分列北嚮器數並同季春吉已饗

先蠶樂部率掌儀司內監陳樂於壇下左右六合鼓一方響十有六雲璈二琴四瑟二簫六篴六笙六杖鼓二拍版二均北嚮春秋二仲月諏吉祭帝王廟樂部率太常協律郎等設中和韶樂於殿外階上分左右懸北嚮陳佾舞於樂懸之次如常儀春秋上丁釋奠於

先師樂部率太常協律郎等設中和韶樂於殿外階
上編鐘在東編磬在西皆十有六懸以筍簾設
建鼓一於鐘懸之次左麾一柷一搏拊一笙三
西嚮右敔一笙三搏拊一東嚮東西分列琴六
瑟四排簫二簫六篴六壎二篳四均北嚮陳文
舞六佾於殿外引舞旌節二羽籥三十有六歲
旱祈雨於

天神樂部率太常協律郎等設樂懸於階下之南陳

佾舞於樂懸之次均北嚮如式報祀同祈雨於地祇樂部率太常協律郎等設樂懸於階下之北陳

佾舞於樂懸之次均南嚮如式報祭同

祭方嶽並同惟

無佾舞孟春上旬諏吉及歲除前一日祀

太歲樂部率太常協律郎等設中和韶樂於殿內分左右懸北嚮陳佾舞於樂懸之次歲旱祈雨報祀同每歲祭

先醫於景惠殿和聲署官設慶神歡樂於西階下雲

璫一笙二管二篴二鼓一拍版一

火神廟設樂於西階下

顯佑宮

關帝廟

城隍廟

東嶽廟

黑龍潭龍神祠

玉泉龍神祠均設樂於西階上興工祭

后土

司工之神和聲署設樂於祭所西序迎吻祭

竈神

門神和聲署設樂於各壇前西序器數均與祭

先醫同

一朝會燕饗之樂順治初年定元日長至

萬壽聖節及常朝皆用中和韶樂羣臣行禮用丹陛

大樂

躬祀

壇

廟禮成回鑾

乘輿出入一切慶典用導迎樂樂章均用平字燕饗
侑食殿廷清樂以樂辭之首句為章名部燕衍
聖公及文進士恩榮武進士鷹揚燕鄉飲酒於
順天府學皆教坊司作樂承應○又定

皇太后宮三大節朝賀均用丹陛大樂○康熙十六年

增設

太皇太后宮中和韶樂○二十五年增設

皇太后宮中和韶樂○乾隆六年

諭殿陛中和韶樂音律節奏與樂章字句覺有未協
可即奏試察明具奏欽此遵

旨議準

殿陛中和韶樂關朝會之隆儀宜情文之悉備協
諸聲韻而定樂章被之管絃以成音律要必人

聲既和而後從之謹按見在三大節奏樂十二
成惟淑平順平二成每章八句其元平和平遂
平允平乾平泰平怡平升平豫平履平十成樂
章均每章十句每句四字而按之音律節奏則
每章八句每句六七八字不等以十句四字之
樂章和以八句六七八字之音律其長短抑揚
宜有不盡調協應將樂章字句按音律之節奏
以調和之章酌從八句句無拘四字令翰林院

酌擬樂章十二成交內務府詳細按律奏試務期調協盡善進呈

御覽以昭依永和聲八音克諧之盛○七年奏準朝會樂章字句太多廷臣禮畢則樂工隨意止樂亦屬非體應用七言四句以排班趨進立定之節候為第一句完奏以節鼓下三句每一跪三叩起立之節候各完一句奏以節鼓九叩禮成恰完四句至

皇帝於

皇太后前行禮不便與臣下辭同應為五言四句節奏

如前謹擬樂章進

呈

欽定後行文禮部內務府令樂工演習奉

旨所奏五言七言近於詩句樂章仍以長短句為是
準其字數相與彷彿可也○又議準三大節廷臣
行禮惟於叩首時奏樂實屬無義可尋且亦不

便於用請嗣後定丹陛樂為五節於贊排班聲止之後樂作贊退後羣臣趨至仗末之時樂止以一節為趨進三節為三跪九叩一節為趨退如有進表宣表禮儀則於第一節樂闋羣臣已跪之後進表宣表畢樂再作如此則節奏既分遲速合度樂之始終條理與禮之進退趨蹌適相比附○又奏準丹陛樂與中和韶樂音節不同因丹陛樂有章而不歌故樂章字句舊未審

詳與中和韶樂一例四字為句按諸音律不相符合自應改正○又奏準

皇后宮三大節升座還宮均用中和韶樂行禮用丹
陛大樂○又奏準和聲署導迎樂奏佑平禧平
之章向例均繫奉鑾以漢語贊奏嗣後請用贊
禮郎以國語贊奏庶與各贊相之禮畫一○是
年具奏

內廷行禮丹陛大樂未載章名謹擬定章名恭候

欽定奉

旨用黼平○又遵

旨議準元日冬至

萬壽三大節並以黃鐘為宮

朝會燕饗各以其月之律為宮

皇太后

皇后宮三大節均以南呂為宮○八年奉

旨嗣後閏月常朝所用樂章視時憲書所載交節之

前用上月宮調交節之後用下月宮調永著為例

○十七年奏準導迎樂章凡

躬祭回鑾皆奏祐平一應慶典皆奏禧平

一隊舞崇德二年元日樂舞人等分別伎藝賞

銀有差○順治十年元日舞官十有六人每人

給賜朝衣樂舞人等每名賞銀有差○十一年

元日舞官各賞蟒段樂舞人等各賞銀有差○

康熙四年元日舞官各賞蟒段鞍馬樂舞人等

各賞馬段紬布有差○十二年定舞官各賞蟒
段大段樂舞人等各賞紬段布疋有差○乾隆
八年奏準隊舞名色總名慶隆舞介冑騎射為
揚烈舞大臣朝服隊舞為喜起舞竹馬為禺馬
所戴醜面為面具綽爾多密什幫總名為蒙古
樂曲綽爾多密為笳吹什幫為番部合奏跳擺
索為繩技瓦爾喀隊舞為瓦爾喀部樂伎歌章
為司章騎竹馬為司舞彈琵琶為司琵琶彈三

絃為司三絃搗箏為司箏拉胡琴為司阮劃箕
為司節拍版為司拍拍掌人為司抃高麗觔斗
總名為朝鮮國俳擊鼓人為朝鮮鼓伎吹箏為
朝鮮箏伎頭領為朝鮮俳長掌儀司觔斗人奉
旨改為擲倒伎瓦爾喀總名為瓦爾喀部舞者為瓦
爾喀部舞者敲樸子為擊缶伎竹口琴人為瓦
爾喀感栗伎胡琴為瓦爾喀阮伎糴合子人為
火樹童子唱秧歌人為禾辭伎○十四年平定

金川凱旋

賜宴奏德勝舞

一樂器順治初年定中和韶樂麾一金編鐘十
有六玉編磬十有六琴四瑟二排簫二簫二篴
二笙四壎二篪二建鼓一搏拊二祝一敔一丹
陛大樂戲竹二方響二雲璈二篴四管四笙四
大鼓二杖鼓一拍版一清樂二部一

殿廷清樂一丹陛清樂均雲璈二篴二管二笙二

小鼓一杖鼓一拍版一導迎樂戲竹二雲璈二

簫四管六笙二大鼓一拍版一○鐃歌鼓吹畫

角二十有四摑鼓四十有八應角鼓八杖鼓二

拍版二金二鈺四簫十有二大銅角八小銅角

八○前部大樂

舊名大
罕波

大銅角四小銅角四金

口角四○鐃歌大樂大銅角八小銅角八金口

角八銅鼓四金二鈺一點一鼓一○鐃歌清樂

雲璈二簫二管二笙二鼓一鈺一點一○部燕

樂雲璈二篴二管二笙二鼓一拍版一○雍正
二年定

耕耜三十六禾辭樂金鼓簫篴笙拍各六領樂官六
人○乾隆七年定

先蠶壇採桑歌樂金鼓拍版各二簫篴笙各六○又
奏準恭按

太和殿

皇帝陞座所用中和韶樂止有笙四簫二篴二殿廷

高敞惟聞鐘鼓之聲按明會典所載樂器笙十有六簫十有二篴十有二多於今數倍嗣後笙請用八簫篴均請用四庶幾克諧至歌工二人似亦太少請增為四人並請

宮內應用中和韶樂一例增設

一朝會燕饗設樂元日長至

萬壽聖節常朝樂部率和聲署陳中和韶樂於

太和殿檐下金編鐘在東玉編磬在西皆十有六

懸以筍簾設建鼓一於鐘懸之西左麾一柷一搏拊一西嚮右啟一搏拊一東嚮左右司歌章者各二人東西嚮左右分列琴四瑟二排簫二簫四篴四笙八壎二篪二均北嚮領樂官東西各四人署史三十五人設丹陛大樂於

太和門檐下東大鼓一方響一雲璈二簫二篴四管四笙四杖鼓一拍版一西大鼓一方響一樂皆北嚮領樂官東西各二人樂工二十二人節

以戲竹領樂官二人率執戲竹者二人夾丹陛
中階立東西面

慈寧宮朝賀內監陳中和韶樂於

慈寧宮檐下陳丹陛大樂於

長慶門內

於

皇后行禮時移
慈寧門內檐下

皇后宮朝賀陳中和韶樂於

交泰殿檐下陳丹陛大樂於儀駕之南皆左右北

嚮

太和殿筵燕侑食奏清樂一設於殿外中和韶樂
之後一設於丹陛大樂之東巡酒奏慶隆舞樂
及諸樂舞均先蒞於殿外

車駕出入及進種桂進鈎筐齋榜用導迎樂均領樂
官六人率署史二十人豫設於

午門外

頒朔進春進表箋均領樂官二人率署史二十人豫
設導迎樂於禮部欽天監進書豫設於纂修館

前迎吻豫設於琉璃密禮部

賜衍聖公燕及恩榮燕兵部鷹揚燕均和聲署設樂
器五魁舞舞童五人歌舞均豫俟於大堂露臺
下鄉飲酒禮設樂於府學西階下○饒歌鼓吹
設於

午門外○

車駕省方蒙古畫角並饒歌大樂饒歌清樂設於旌
門外左右○

郊祀回鑾前部大樂設自壇門止於

天安門

耕藉三十六禾辭樂設於藉田左右

親蠶採桑歌樂設於桑園之左右

欽定大清會典則例卷九十八

欽定四庫全書

欽定大清會典則例卷九十九

樂部

神樂署

一中和韶樂樂章

圜丘

黃鐘
為宮

九奏迎

帝神奏始平之章曰欽承純祐兮於昭有融時維永清
兮四海攸同輸忱元祀兮從律調風穆將景福

兮迺眷微躬淵思高厚兮期亮天工聿章彝序
兮夙夜宣通雲輶延佇兮鸞輅空濛翠旗紛裊
兮列缺豐隆肅始和暢兮恭仰蒼穹百靈祇衛
兮齋明辟公神來燕娛兮惟帝時聰協昭慈惠
兮遯鑒臣衷○奠玉帛奏景平之章曰靈旗爰
止兮樂在縣執事有恪兮奉玉筵聿昭誠敬兮
駿奔前嘉玉量幣兮相後先來格洋洋兮思儼
然臣忱翼翼兮告中虔○進俎奏咸平之章曰

吉蠲為饔兮肅豆籩升饔列俎兮敢弗虔毛魚
繭栗兮薦膏鮮致潔陶匏兮香水泉願垂降鑒
兮駐雲駢錫嘉福兮億萬斯年○初獻奏壽平
之章曰玉笋肅陳兮明光桂漿初醞兮信芳臣
心迪惠兮奉觴醴齊載德兮馨香靈慈徽眷兮
喬皇勤仰止兮斯徜徉○亞獻奏嘉平之章曰
考鐘拂舞兮再進瑤觴翼翼昭事兮次第肅將
睟顏容與兮蒼几輝煌穆穆居歆兮和氣洋洋

生民望澤兮仰晚玉房榮泉瑞露兮慶無疆○
終獻奏永平之章曰終獻兮玉帛清肅拒鬯兮
薦和羹磬管鏘鏘兮祀孔明旨酒盈盈兮勿替
思成明命顧諟兮福羣生八龍蜿蜒兮苞羽和
鳴○徹饌奏熙平之章曰一陽復兮協氣伸盟
薦畢兮精白陳旋廢徹兮敢逡巡禮將成兮樂
欣欣瞻九閭兮轉洪鈞福施下逮兮佑此人民

送

帝神奏清平之章曰升中告成兮晬霽壇場穆思廻盼
兮雲駕洋洋臣求時惠兮感恩馨香願蒙博產
兮多士思皇天施地育兮百穀蕃昌殖我嘉師
兮正直平康○望燎奏太平之章曰隆儀告備
兮誠既將有虔秉火兮煇越芳雷車電邁兮九
龍驤紫氛四塞兮靈旗揚蒸民蒙福兮順五常
惟予小子兮敬戒永臧

祈穀迎

帝神奏祈平之章曰帝篤佑民兮求莫匪舒小民何依
兮飲食惟需莫嘉於穀兮萬事權輿為民請命
兮豈非在予日用辛兮百辟趨嚮將出兮東風
徐惟予小子兮敬盥陳孚皇皇龍駕兮穆將愉
○奠玉帛奏綏平之章曰念茲稼穡兮惟民天
農用八政兮食為先雨暘時若兮玉燭全粒我
蒸民兮迄用康年仰三無私兮昭事虔奉璋承
帛兮慄若臨淵○進俎奏萬平之章曰鼎烹兮

苾芬嘉薦兮無文升繭栗兮惟惇羶鄉達兮干
雲昭民力兮普存惟明德兮馨聞○初獻奏寶
平之章曰初獻兮元酒盈致純潔兮儲精誠瑟
黃流兮壘承酌其中兮外清明儼對越兮維清
帝心歆假兮綏我思成○亞獻奏穰平之章曰
犧尊啟兮告虔清醑既馨兮陳前禮再獻兮祠
筵光煜爚兮非煙神悅懌兮僾然惠我嘉生兮
大有年○終獻奏瑞平之章曰終獻兮奉明粢

必芬嘉旨兮清醴既醺神其衍兮錫祉禮成於
三兮陳辭願灑餘瀝兮沐羣黎臣拜手兮青墀
○徹饌奏渥平之章曰俎豆具陳兮庶品宜胙
嚮昭鑒兮荷帝慈饌告備兮玉几登歌洋溢兮
廢徹不遲肅微忱兮告終事上帝居歆兮錫純
禧○送

帝神奏滋平之章曰祇奉天威兮弗敢康小心翼翼兮
昭穹蒼雲垂九天兮露瀼瀼翠旗羽節兮上翔

翔臣拜下風兮肅徬徨願沛汪澤兮民多益藏
○望燎奏穀平之章曰叩首兮天閭混茫一氣
兮浩無方煇蕭束帛兮薦馨香精誠感格兮降
福穰穰四時順序兮百穀以昌臣同兆姓兮咸
荷恩光

雩祭迎

帝神奏霽平之章曰粒我蒸民兮神降嘉生雨暘時若
兮百穀用成龍見而雩兮先民有程臣膺天祚

兮敢不祇承念我農兮心靡寧肅明禋兮殫精
誠靈皇皇兮穆以清金支五色兮罨靄蜺旌○
奠玉帛奏雲平之章曰玉帛載陳兮磬管鏘鏘
為民請命兮惕弗敢康令清和兮遂百昌麥秀
岐兮禾芾稂日照九兮時雨滂俾萬寶兮千斯
倉○進俎奏需平之章曰越十雨兮越五風三
光昭明兮嘉氣蒙天所予兮渺躬予小子兮凜
降豐紛總總兮賴皇穹惇牡鴈烹兮達臣衷○

初獻奏霖平之章曰酌彼兮壘洗飴芬兮椒香
愧明德兮維馨假黍稷兮誠將願大父兮念茲
衆子穆將愉兮綏以豐穰○亞獻奏露平之章
曰再酌兮醕清仰在上兮明明庶來格兮鑒誠
曷敢必兮屏營合萬國兮形神精承神至尊兮
思成○終獻奏霖平之章曰三酌兮成純備物
致志兮敬陳多士兮駿奔靈承無斁兮明禋維
蕃釐兮媪神雨留甘兮良苗懷新○徹饌奏靈

平之章曰禮將成兮舞已終徹弗遲兮畏神恫
願留福兮惠吾農神之貺兮協氣融遂及私兮
越我公五者來備兮錫用豐○送

帝神奏靈平之章曰祥風瑞靄兮彌靈壇上帝居歆兮
風肅然左蒼龍兮右白虎般裔裔兮紉縵縵仰
九閭兮返御介祉釐兮康年○望燎奏需平之
章曰碧粼粼兮不可度思九奏終兮燿火哲而
神光四燭兮休氣夥頤安匪舒兮抑抑威儀帝

求民莫今日鑒在茲錫福繁祉兮庶徵曰時○

御製大雩樂章

瞻彼朱鳥鵜首是臨協紀辨律羽蟲徵音萬物芸
生有壬有林有事南郊陟降維欽瞻仰昊天生物
為心○維國有本匪民伊何維民有天匪食則那
為民祈福平秩南訛我祀敢後我樂維和鼉鼓淵
淵童舞娑娑○自古在昔春郊夏雩旱則致禱田
燭朝趨盛禮既陳神留以愉雷師闐闐飛廉衙衙

需時甘霖利我新畬○於穆穹宇在郊之南對越
嚴恭上帝是臨庇蔭嘉穀用將悃忱惴惴我躬肅
肅我心六事自責仰彼桑林○權輿粒食實維后
稷百王承之永奠邦極惟予小子臨民無德敢懈
祈年潔衷翼翼命彼秩宗古禮是式○古禮是式
值茲吉辰玉磬金鐘大羹維醇元衣八列舞羽續
紛既侑上帝亦右從神尚鑒我衷錫我康年○惟
天可感曰惟誠恪惟農可稔曰惟力作恃天慢人

弗刈弗穫尚勤農哉服田孔樂咨爾保介庠乃錢
鎛○我禮既畢我誠已將風馬電車旋駕九閭山
川出雲為靈澤滂雨公及私興鋤利甿億萬斯年
農夫之慶

方澤

林鍾
為宮

八奏迎

神奏中平之章曰吉蠲兮玉宇開薰風兮自南來鳳馭
紛兮後先岳瀆霽兮徘徊肅展禮兮報功沛靈
澤兮九垓○奠玉帛奏廣平之章曰式時吉土

兮中壇祀我郊兆兮孔安辟公趨蹌兮就列考
鐘伐鼓兮舞干黃琮織縞兮既奠靈光下燭兮
誠丹○進俎奏含平之章曰禮行樂奏兮未央
嘉肴有踐兮大房牲牷告歆兮惟恪民力普存
兮肅將厚載資生兮無外几筵來格兮洋洋○
初獻奏太平之章曰醴齊融冶兮信芳博碩升
庖兮鼎方清風穆穆兮休氣翔神明和樂兮舉
初觴洽百禮兮禋祀罄九土兮豐穰○亞獻奏

安平之章曰一茅三脊兮縮聚山壘雲幕兮馨
香介黍稷兮芳旨再滌犧尊兮敬將樂成八變
兮綴兆儼皇祇兮悅康○終獻奏時平之章曰
紫壇兮嘉氣盈旨酒思柔兮和且平凜茲陟降
兮心屏營禮成三獻兮薦玉觥含弘光大兮德
厚靈佑丕基兮永清○徹饌奏貞平之章曰玉
俎列兮庶品該黃琮告徹兮雲翔徊晏陰定兮
曦景回南訛秩兮日恢台肅惟昭明兮孔邇覃

博厚兮奠九垓○送

神奏寧平之章曰靈旗兮雲路遵飛龍蜿兮高旻陰儀粹兮德純眷四海兮無塵配皇穹兮兩大綏下

土兮蒸民

太廟時饗

太族為宮

六奏迎

神奏貽平之章曰肇茲區夏世德欽崇九州維宅王業

自東戎甲十三奮起飛龍維神格思皇靈顯融

奠帛初獻奏牧平之章曰於皇祖考克配上

天越文武功萬邦是宣孝孫受命不忘不愆羹
牆永慕時薦斯虔○亞獻奏敷平之章曰絜祀
精忱洋洋如生尊壘再舉於赫昭明藹然有容
愾然有聲我懷靡及惕若中情○終獻奏紹平
之章曰粵若祖德誕受方國肆予小子大猷是
式欲報之德昊天罔極慤勤三獻中心翼翼○
徹饌奏光平之章曰庶物既陳九奏具舉告成
於祖亦右皇妣敬徹不遲用終殷祀式禮如茲

皇其燕喜○還宮奏又平之章曰對越無方陟
降無迹寢祐靜淵孔安且吉惟靈在天惟主在
室於萬斯年孝思無斁

大裕迎

神奏開平之章曰承眷命兮撫萬邦嗣丕基兮祖德昌
溯謨烈兮唐哉皇虔歲祀兮式舊章肅對越兮
誠悃將尚來格兮仰休光○奠帛初獻奏肅平
之章曰粵我先兮肇俄朶長白山兮鵲銜果綿

瓜瓞兮天所佐明之侵兮殲其左混中外兮逮
乎我奉太室兮安以妥○亞獻奏協平之章曰
紛歲蕤兮列聖臨儼對越兮心欽欽陳纖縞兮
有壬林擊浮磬兮彈朱琴恪溥將兮俶來歆錫
嘉祉兮天地心○終獻奏裕平之章曰椒飴芬
兮神留俞爵三獻兮旨清醕萬羽干兮樂孔都
禮明備兮罔敢渝神醉止兮咸樂胥永啟佑兮
披皇圖○徹饌奏誠平之章曰祝幣陳兮神燕

娛尊俎將兮反威儀悅且康兮徹弗遲不可度
兮矧射思禮有成兮釐百宜鑒精誠兮第祿綏
○還宮奏成平之章曰龍之馭兮旋穆清神之
御兮式丹楹瞻列聖兮優容聲廻靈眄兮佑丕
承維神聽兮和且平繼序皇兮亶休徵

社稷壇

春以夾鐘為宮
秋以南呂為宮

七奏迎

神奏登平之章曰媼神蕃釐兮厚德隆嘉生繁祉兮
功化同壇墠儼肅兮風露融我稷翼翼兮黍芄

凡望雲駕兮驂鸞龍植璧秉圭兮冀感通○奠
玉帛初獻奏茂平之章曰恪恭禋祀兮肅且雍
清醑既載兮臨齋宮朝踐初舉兮玉帛共洋洋
在上兮鑒予衷○亞獻奏育平之章曰樂具入
奏兮聲喤喤鬱鬯再升兮賓八鄉厚德配地兮
佑家邦綏我豐年兮兆庶康○終獻奏敦平之
章曰方壇北宇兮神中央盈庭萬舞兮帟低昂
酌酒三爵兮桂醑香清雖舊邦兮命溥將○徹

饌奏博平之章曰大房籩豆兮儼成行歆此吉
蠲兮神廸嘗廢徹不遲兮餘芬芳桐生茂豫兮
百穀昌○送

神奏樂平之章曰孔蓋翠旌兮隨風颺龍輶容與兮
指天閭咫尺神靈兮隔穹蒼願流景祚兮貺皇
章○望瘞奏徵平之章曰玉既陳兮延景光禮
既洽兮恭瘞藏願神聽兮時予匡垂神佑兮永
無疆

祈雨報謝

祈雨以夾鐘為宮
報祀以南呂為宮

六奏迎

神奏延豐之章曰九土博厚兮阜嘉生方壇五色兮

祀孔明毗力穡兮服耕仰甘膏兮百穀用成熙

雲路兮瞻翠旌殷闔澤兮展精誠○奠玉帛初

獻奏介豐之章曰神來格兮宜我黍稷兩圭有

邸兮馨明德壘尊湛湛兮干羽飭油雲澍雨兮

溥下國○亞獻奏滋豐之章曰奏暨明兮申載

觴龍出泉兮靈安翔周寰宇兮滂洋載神庥兮

悅康○三獻奏需豐之章曰帙容與兮奮皇舞
聲遠姚兮震靈鼓爵三奏兮縮桂醕號屏來御
兮德施普○徹饌奏綏豐之章曰協笙磬兮告
吉蠲神廸嘗兮禮莫愆心齋肅兮增惕乾咨田
畯兮其樂有年○送

神奏貽豐之章曰撫懷心兮神聿歸華蓋郅偁兮驂
虬駢洪釐渥兮雨祁祁公私霑足兮孰知所為
望瘞奏溥豐之章曰宣祝嘏兮列瘞繒眈允

答兮時欽承高原下隰兮以莫不興歌率育兮

慶三登

日壇

太族為宮

七奏迎

神奏寅曦之章曰曦馭兮寅賓光煜燭兮紅輪春已
融兮交泰循典禮兮明禋嚴大采兮祗肅神之
來兮如雲○奠玉帛奏明曦之章曰杲黃道兮
噉出東肅將享兮玉帛同美齊翼兮王君公盥
以薦兮昭格通○初獻奏清曦之章曰御景風

兮下帝局酌黃目兮椒其馨爵方舉兮歌且舞
漾和盞兮龍旗青○亞獻奏咸曦之章曰再舉
勺兮鬱金香嘉樂合兮舞洋洋德恢大兮神在
沛澹容與兮進霞觴○終獻奏純曦之章曰式
禮莫愆兮昭清終以告虔兮休成願神且留兮
鑒茹以妥以侑兮忱誠○徹饌奏延曦之章曰
物之備兮希德馨神欲起兮景杳冥徹不遲兮
咸肅穆照臨下土兮瞻曜靈○送

神奏歸曦之章曰雲車征兮風馬翔
森萬里兮臨萬方報神功兮以時享
祈神祐兮永無疆

月壇

南呂為宮

六奏迎

神奏迎光之章曰繼日代明兮象麗天
式遵九道兮臨八埏玉律分秋兮西顓
躔聿修祀兮樂在縣○奠玉帛初獻奏
升光之章曰少采兮將事玉帛兮載陳
式舉黃流兮挹犧尊籩豆靜嘉兮肴核
芬○亞獻奏瑤光之章曰齊醴兮載獻
神

之來兮肅然仰肝嚮兮鑒顧挹清光兮几筵○
終獻奏瑞光之章曰戛瑟鳴琴兮銷玉鏘神嘉
虞兮申三觴金波穆穆兮珠煇黃休嘉碑隱兮
溢四方○徹饌奏涵光之章曰對越在天兮禮
成徹登豆兮湛露零神悅懌兮德馨世曼壽兮
安以寧○送

神奏保光之章曰駕卿雲兮景星御和風兮霞輶神
留俞兮壇宇福率土之黃丁

帝王廟

春以夾鐘為宮
秋以南呂為宮

六奏迎

神奏肇平之章曰撫時兮極隆造經綸兮顯庸總古

今兮一揆貽大寶兮微躬仰徽猷兮有嚴闕宮

予稽首兮下風○奠帛初獻奏興平之章曰莽

若雲兮神之行予仰止兮在廷承筐篚兮既登

偃靈蓋兮翠旌鑒予情兮歆享薦芳馨兮肅成

○亞獻奏崇平之章曰貳觴兮酒行念昔致治

兮永清瞻龍袞兮若英願紹錫兮嘉平○終獻

奏恬平之章曰鬱鬯兮獻終萬舞洋洋兮沐清
風龍鸞徐整兮企予示周行兮迪予衷○徹饌
奏淳平之章曰盍肴蒸兮畢升五音會兮滿盈
禮將徹兮虔告鑒孔忱兮載翼載登○送

神奏匡平之章曰羽幢繚繞兮動回風和鸞並馭兮
歸天宮五雲擁兮高馳翔願回靈盼兮錫年豐
駕羣龍兮一氣中焄蒿芬烈兮實冥通望神光
兮遙燭惟終古今是崇

文廟

春以夾鐘為宮
秋以南呂為宮

六奏迎

神奏昭平之章曰大哉至聖德盛道隆生民未有百

王是崇典則昭垂式茲辟雍載虔簠簋載嚴鼓

鐘○奠帛初獻奏宣平之章曰覺我生民陶鑄

賢聖巍巍泰山實予景行禮備樂和豆籩嘉靜

既述六經爰斟三正○亞獻奏秩平之章曰至

哉聖師克明明德永鐸萬年惟民之則清酒既

醑言觀秉翟太和常流英材斯植○終獻奏敘

平之章曰猗歟素王示予物軌瞻之在前師表
萬祀酌彼金罍我酒惟旨登獻雖終弗遐有喜
○徹饌奏懿平之章曰璧水淵淵芹芳藻潔既
歆宣聖亦儀十哲聲金振玉告茲將徹饌假有
成日月昭揭○送

神奏德平之章曰煌煌辟雍四方來宗既陶樂育多
士景從如土斯埴如金在鎔佐予敷治俗美時
雍

直省

文廟六奏迎

神奏昭平之章曰大哉孔子先覺先知與天地參萬
世之師祥徵麟紱韻答金絲日月既揭乾坤清
夷○初獻奏宣平之章曰予懷明德玉振金聲
生民未有展也大成俎豆千古春秋上丁清酒
既載其香始升○亞獻奏秩平之章曰式禮莫
愆升堂再獻響協鼗鏞誠孚壘甌肅肅雍雍譽

髦斯彥禮陶樂淑相觀而善○終獻奏敘平之
章曰自古在昔先民有作皮弁祭菜於論斯樂
惟天牖民惟聖時若彝倫攸敘至今木鐸○徹
饌奏懿平之章曰先師有言祭則受福四海
宮疇敢不肅禮成告徹毋疏毋瀆樂所自生中
原有菽○送

神奏德平之章曰鳧繹我我洙泗洋洋景行行止流
澤無疆聿昭祀事祀事孔明化我蒸民育我膠

庠

先農壇

姑洗
為宮

七奏迎

神奏永豐之章曰先農播穀克配彼天粒我蒸民於
萬斯年農祥晨正協風滿籩曰予小子宜稼於
田○奠帛初獻奏時豐之章曰厥初生民萬彙
莫辨神錫之庥嘉種乃誕斯德曷酬何名可贊
我酒惟旨是用初獻○亞獻奏咸豐之章曰無
物稱德惟誠有孚載升玉瓚神肯留虞惟茲兆

庶豈異古初神曾子之今其食諸○終獻奏大
豐之章曰秬秠糜芑皆神所貽以之饗神式食
庶幾神其丕佑佑我黔黎萬方大有肇此三推
○徹饌奏屢豐之章曰青衿司職土膏脈起日
涓吉亥舉耕藉禮神安留俞不我遐棄執事告
徹予將舉趾○送

神奏報豐之章曰匪且有且匪今斯今靈雨崇朝田
稼萬金考鐘伐鼓戛瑟鳴琴神歸何所大地秧

鉞○望瘞奏慶豐之章曰肅肅靈壇昭上天
神下神歸其風肅然玉版蒼幣瘞埋告虔神之
聽之錫大有年

先蠶壇

仲呂為宮

六奏迎

神奏庠平之章曰軒轅御錄時西陵位正妃柔桑沃
載陽遲黼黻元黃共祀事稱繭更繅絲龍精報
貺椒室宗師○初獻奏承平之章曰春隄柳綻
金倉庾有好音衣褱翟致精忱后月躬應教織

經柘館式齋心黃流初薦肝饗如臨○亞獻奏
均平之章曰清和日正長靈壇水一方紆香陌
執籩筐桑葉陰濃風澹蕩八育普嘉祥黃流再
薦降福穰穰○終獻奏齊平之章曰神臯接上
園葭蘆翠浪翻鶯聲滑藕花繁天棘絲絲初引
蔓三薦潔蘋繁雲依寶鼎露浥旗旛○徹饌奏
柔平之章曰公宮吉禮成有齋奉豆登僮僮被
肅肅升廢徹毋遲咸祇敬法坎不常盈萬方衣

被百福其朋○送

神奏洽平之章曰神風拂廣筵靈香下肅然儀不忒
禮無愆禹馬流星相炳絢玉螭互平川萬方衣

被瑞繭登編

神祇壇祈雨報謝

天神黃鐘為宮
地祇林鐘為宮

六奏迎

神奏祈豐之章曰雲車馳兮風旆征雷闐闐兮雨冥

冥表六合兮穹青橫大川兮揚靈紛總總兮來

會穆予心兮齋明○奠帛初獻奏華豐之章曰

束帛戔戔兮筐篚將昭誠素兮鬯馨香瘳此下
民兮候有望神垂鴻祐兮未渠央○亞獻奏興
豐之章曰疏幕兮再啟芳齊兮載陳惠邀兮神
貺福我兮民人○終獻奏儀豐之章曰犧尊兮
三滌旨酒兮思柔誠無數兮嘉薦神燕娛兮降
休○徹饌奏和豐之章曰禮既成兮孔殷潔明
粢兮苾芬廢徹兮不遲至敬兮無文○送

神奏錫豐之章曰流形兮露生苞符兮孕靈介我黍

稷兮曰雨而雨神之格思兮祀事孔明

岱廟

林鐘為宮

六奏迎

神奏祈豐之章曰資元氣兮鎮青陽鼓橐籥兮孕靈
祥行時令兮東巡式展禮兮誠將○奠帛初獻
奏華豐之章曰金壇肅穆兮黼帷張瑟黃流兮
茅縮聚昭誠素兮舉初觴神斯陟降兮格馨香
○亞獻奏興豐之章曰日觀兮雞鳴天門兮鳳
翔犧尊兮再獻維神兮降康○終獻奏儀豐之

章曰醴齊兮三薦金牒兮輝煌申至敬兮無祈
鑒予誠兮齋莊○徹饌奏和豐之章曰瞻石閭
兮在望實籩豆兮大房黍稷兮非馨明德兮是
將○送

神奏錫豐之章曰禮成兮孔臧神駕兮龍驤膚寸而
合兮觸石而起彌於六合兮降福穰穰

嵩廟

林鐘
為宮

六奏迎

神奏祈豐之章曰維靈嶽兮鎮中央展時巡兮洛之

陽虔望秩兮懷柔儼對越兮神光○奠帛初獻
奏華豐之章曰石闕宮堯兮鳴鳳翔奏瑤笙兮
肅裸將初奉竿兮陳篚筐至誠昭格兮福無疆
○亞獻奏興豐之章曰潁水兮安怡緱嶺兮青
蒼黃琮兮告薦椒醑兮芬芳○終獻奏儀豐之
章曰香升兮華黍三滌兮嘉觴答靈響兮嵩門
登萬寶兮咸昌○徹饌奏和豐之章曰三臺蔚
兮峻極二室鬱兮相望告徹兮維時懷德兮靡

忘○送

神奏錫豐之章曰雲車兮龍驤仰止兮高閭玉漿含
滋兮金璧呈瑞配天作鎮兮長發其祥

望祭

長白山六奏迎

神奏祈豐之章曰天作高山兮作而康鍾王氣兮應
期昌巡豐沛兮來望躬禋祀兮虔將○初獻奏
華豐之章曰飮黃流兮進初觴緬仙源兮心邀

莊靄佳氣兮鬱蒼蒼欣來格兮惠無疆○亞獻
奏興豐之章曰朱果兮實蕃靈淵兮澤滂清尊
兮再獻綿祚兮純常○終獻奏儀豐之章曰具
薦兮玉饌三酌兮瓊漿思王迹兮彌欽清緝熙
兮敢忘○徹饌奏和豐之章曰松花水兮湯湯
鴨綠波兮泱泱神飫兮錫釐如川至今莫量○
送

神奏錫豐之章曰祀事兮孔臧昭假兮永明邁周岐

兮越殷土萬有千歲兮長發其祥

太歲殿

太簇為宮

六奏迎

神奏保平之章曰協茲五紀歲月日辰天惟顯思
神職攸分於赫太歲統馭百神承天之德陰隲
下民○奠帛初獻奏定平之章曰禮崇明祀涓
選休成潔齋滌志量幣告誠祈福維何福我蒼
生陳饋奉酎瞻仰雲旌○亞獻奏嘏平之章曰
百末蘭生有斐其香升歌清越磬管鏘鏘牲牷

肥腴嘉薦令芳神其歆止在上洋洋○終獻奏
富平之章曰執事有嚴再拜稽首三爵既升以
妥以侑盥薦有孚肅茲籩豆神其歆止人民曼
壽○徹饌奏盈平之章曰王省惟歲有報有祈
六氣無易平衡正璣嘉生蕃祉澤及蜎飛百禮
以洽承神吉輝○送

神奏豐平之章曰神兮旋馭肅瞻景光靈飈上下
無體無方嘉承惠和億兆溥將歲歲大有神其

廸嘗

祈雨報謝迎

神奏需豐之章曰持元化兮富媪神秉歲籥兮六
氣均馳雲車兮風旗殷闐闐兮天門情徬徨兮
孔殷神之來兮康我民○奠帛初獻奏宜豐之
章曰薦嘉幣兮芳醴清練予素兮升飴馨紛肸
蠁兮格歆甘膏沃兮神所令○亞獻奏晉豐之
章曰啟山壘兮攝椒漿侑神宮兮靈洋洋族雲

興兮使我心若惠嘉生兮降康○終獻奏協豐
之章曰清竿兮三耒揚翟籥兮載愉靈回翔兮
六幕澤霽霈兮遍八區○徹饌奏應豐之章曰
禮儀備兮孔時音繁會兮徹不遲昭靈貺兮迓
蕃祉田多稼兮汜濩之○送

神奏洽豐之章曰顧億兆兮誠求渥甘澍兮神之
休慶時若兮百昌遂惠我無疆兮歲有秋

欽定大清會典則例卷九十九

欽定四庫全書

史部

欽定大清會典則例卷一百

詳校官檢討臣劉 炳

編修臣程嘉謨覆勘

總校官原任中允臣王燕緒

校對官中書臣袁文邵

謄錄監生臣金三俊

欽定四庫全書

欽定大清會典則例卷一百

樂部

和聲署

一中和韶樂樂章元日

黃鐘為宮

御殿陞座奏元平之章曰維天眷我皇四海昇平泰

運昌歲首肇三陽萬國朝正拜帝閭雲物奏嘉

祥乘鸞路建太常時和化日長重九譯盡梯航

還宮奏和平之章曰聖人延俊英鈞天樂奏繞彤廷
華夷一統寧士庶懽忻樂太平寶鼎御香盈祥
煙嫖瑞靄生箭韶喜九成齊慶祝萬年齡

長至

黃鐘
為宮

御殿陞座奏遂平之章曰陽回叅谷春萬國衣冠拜
紫宸旭日耀龍鱗雲物呈祥福祿臻堯階冀英
新熙庶績撫五辰九服共來賓調元化轉洪鈞
還宮奏允平之章曰皇心克配天王瑤葭仄得氣先

彤廷臚唱宣四海共球奏御筵珠斗應璣璫金
鏡朗麟鳳騫人間景福全咨屢省懋乾乾

萬壽聖節

黃鐘
為宮

御殿陞座奏乾平之章曰祥雲扈紫萸四海臣民祝
聖齡淑氣轉階蓂堯錄義圖燦御屏嵩呼徧在
廷天呈瑞地効靈南極拱台星億萬載頌康寧
還宮奏泰平之章曰皇躬福祿宜永紹鴻圖丕丕基
彤陛長仙芝樂奏箭韶丹鳳儀南山獻壽卮人

心悅天意隨為德徧羣黎歌樂愷萬年斯

元宵節

太簇
為宮

御殿陞座奏怡平之章曰皇心保泰和海宇昇平樂
事多瓊樹長新柯冰泮春流漲玉河晴雲展細
羅擎堯酒泛天波花舞鳥能歌齊拜手賦卷阿

還宮奏安平之章曰時雍頌帝堯玉佩鏗鏘慶早朝
紫禁瑞煙飄春意凌寒上柳條和風禁苑饒陳
仙樂奏箎韶三五正良宵宮漏永月輪高○正

月太族
為宮

御殿陞座奏隆平之章曰敷天協氣鮮新又蒼龍正
晨萬國歡心仰紫宸皇天錫嘏懿純陳充庭華
瑤金根扇春風風兆人澤如春睿周萬品化洽
無垠

還宮奏顯平之章曰淵然至道遊神協天行地文照
寓騰華若早輪清明廣大和閭恩滂洋葭葦霑
仁念民生生此辰酌於民瑞惟大有寶則賢臣

○二月

夾鐘
為宮

御殿陞座奏隆平之章曰所無逸恭己巖廊萬寓協
嘉祥吹律圜鐘諧舜琯負宸當陽柳風初轉芽
黃翠甸輕雷蘇百昌發生心皇奉若寬大詔播
天常

還宮奏顯平之章曰肅羣后鳴佩鏘鏘拜手仰顙叩
初日瞳矐奎壁麗明庶風翔普天和氣休穰決
化鷹成鳩眼良躬清明基宥密恩溥洽達要荒

○三月姑洗
為宮

御殿陞座奏隆平之章曰日麗風和徧寰區新榆改
火龍旗荏苒晃鸞坡赫如曦皇陞座羣辟集瑤
珂拂花茵垂佩多天門蕩蕩無偏頗純嘏詠卷
阿

還宮奏顯平之章曰瑞靄祥飈映彤墀紅雲繚繞一
人淵默德光昭百花中千門曉銅鶴篆煙飄奏
仙音駕退朝促耕布穀飛靈沼盈耳說農勞○

四月仲呂
為宮

御殿陞座奏隆平之章曰玉宸旦婺中天王御法宮
乘朱路曳長虹六六冷簫諧女鳳萬物被薰風
阜財解慍福祿來同

還宮奏顯平之章曰麥秋滿野登桑農繭已成玉衡
正泰階平上下交孚寰海靖婦子樂盈寧罄天
互地茂豫桐生○五月蕤賓
為宮

御殿陞座奏隆平之章曰禁林清反舌無聲登進忠

良佞不行南風假大而宣平坐明堂賞五德法
乘離以持衡

還宮奏顯平之章曰槿初榮與朱明天稷星邊漢
影萌紅輪照九神嘉生念農芸夏暑雨穆皇心

以靡寧○六月

林鐘
為宮

御殿陞座奏隆平之章曰鼓舍少黃宮諧鳳伏庚光
赤帝騎龍嘒彼三星正昏中茂對乘時穆聖衷
陳金奏宣景風明光覲辟公

還宮奏顯平之章曰彌六合黎元祝頌奉三無帝念
淵冲翦鬱元雲滄宸楓大雨時行黍稷芄虞琴

奏皇在宮勤思劇月農○七月

夷則為宮

御殿陞座奏隆平之章曰金井桐飄大火流夷則聲
清律應秋天行轉蓐收黃茂滿田疇曉光閭闔
浮搏拊戛鳴球玉殿千官咸拜手仰宸旒

還宮奏顯平之章曰鷹祭蟬鳴屆白藏御廩初登穀
始嘗秋回禁陞涼皇居奠總章恩膏正溥將零

露浥瀼瀼六合顒顒齊所印絜珠囊○八月

南呂

為宮

御殿陞座奏隆平之章曰乾坤爽氣澄序宮殿清光
靜安設九賓而法見叶九和於天端晻靄揚雲
罕玲瓏動玉鑾烈徽猷兮萬世肅纓冕兮千官
還宮奏顯平之章曰雲高漢迴參見露白飈清冽寒

沆告成夫萬寶祇祝釐於三壇瑞穀岐而秀玉
粢好且完喜盈寧兮百室納嘉慶兮天歡○九

月無射
為宮

御殿陞座奏隆平之章曰鴻依銀渚菊有黃華隴雲
飛木葉下百穀登場罷芳辰逢令嘉黃麾列正
衙豹竿移龍鱗射日上朱霞天錫吾皇多稼

還宮奏顯平之章曰鞭鳴鐘動簾捲煙斜漾金風香
衣駕天屣言還暇黃雲香滿車村村晝響耒處
深宮心區夏重邱民家黼辰幽風圖畫○十月

應鐘
為宮

御殿陞座奏隆平之章曰時合黃純熙修司職顯皇
執坎持權聽彤廷珮響玉琯風宣懷黃綰白趨
丹陛皇儀展於穆同天光華聖日杲愚煥彩暄
到齊編

還宮奏顯平之章曰寰海豐穰農夫之慶深宮理化
揮絃念艱難稼穡不敢游畋琳琅萬卷環天祿
三餘愛清宴採研時幾勅命明良喜起所寶惟

賢○十一月

黃鐘
為宮

御殿陞座奏隆平之章曰七日陽來天地仁萬象一
中分人從心上起經綸綱紀三才屬大君答陽
臨玉宸無私學化鈞包元履德日勞勤品類盛
荷陶甄

還宮奏顯平之章曰順氣祥風翔九垓太史正書雲
沈幾先物福生人淵默雷聲秉道真八風依序
均天根月窟循昭乎若日正三辰不遠復以修

身○十二月

大呂
為宮

御殿陞座奏隆平之章曰斗柄將東四序周佳氣滿
皇州嘉平吉日諏翠輅充筵立九旂吾皇御大
裘法坐侍王侯服舊德布新猷穆若天儀福祿
道

還宮奏顯平之章曰太室黃雲紫氣蒙時雪報年豐
天關橐籥充臘鼓催春大地通皇家寶緒隆契
合動昭融月西朏日生東萬載回環不息同○

文進士傳臚

為宮

御殿陞座奏隆平之章曰啟文明五色雲呈珊網宏
開羅俊英梧岡彩鳳雖啣鳴氣如珠河似鏡集
賢才於蓬瀛

還宮奏顯平之章曰海榴舒木槿初榮宣賜宮衣最
有名薰來殿角微涼生鳳棲梧麟在圃致皇風

於昇平○武進士傳臚

應鐘
為宮

御殿陞座奏隆平之章曰寶殿雲開朱檐日近甲袍
金瑣玲瓏看敦詩說禮國士之風王朝楨幹資

英俊參帷幄克詰兵戎雲臺繪畫勲名偉績媿
美前蹤

還宮奏顯平之章曰玉燭光調金甌綏靖兩階千羽
雍容念求賢渭水兆協飛熊中林置兔多賢士
資心腹雲起風從龍韜豹畧後先疏附鵬翼搏
風

車駕東巡至盛京

黃鐘
為宮

御殿陞座奏隆平之章曰維天眷我清一統車書四

海寧法駕涖陪京祠謁珠邱展孝誠陟降舊宮
庭思祖德答天明佳氣繞龍旂瞰聖日海東升
還宮奏顯平之章曰文思洽九瀛神孫繼治游昇平
皇初七德成締造艱難景命膺撫序惕中情凝
旒竚若奉盈照茲萬億齡烈祖武敬其繩

駕幸翰林院

黃鐘
為宮

御殿陞座奏隆平之章曰龍文五色偕羽葆亭童法
駕來秘閣列清才就日瞻雲瀛大隈象緯正三

台紉縵縵卿雲迴元首實康哉舟用楫鼎需梅
還宮奏顯平之章曰恩光浹面槐瀛洲十八並追陪
南山頌有臺酒醴笙簧霖雨詣帝屣下蓬萊金
支霽秀華堆文光輝九垓求千里始於隗

命經畧往討金川

以本月
律為宮

御殿陞座奏隆平之章曰臨軒策將聖武恢仙仗挾
風雷龍驤虎賁羣英來專閫正藉勒銘才神機
翊上台恩隆敷是推揚威邊徼圖雲臺承廟畧

往欽哉

還宮奏顯平之章曰絳霄瑞靄六龍迴寰寓靖氛埃
天戈遙指閭闔開敦忠秉信閭外裁風雲列陣
該崇墉計日摧鋒車電掣天馬徠軍聲歡騰九
垓

凱旋行慶賀禮

以本月
律為宮

御殿陞座奏隆平之章曰慶溢朝端靄祥雲河山清
宴鈴旂迢遞送歸鞍赫元戎緊良翰靖獻寸誠

丹戟千戈和佩鸞功成萬里勒銘還遐邇共騰
歡

還宮奏顯平之章曰雉扇徐迴遍堯封齊銷烽燧依
依楊柳六師歸逮春耕修農耒論賞策勲隨九
重深五絃揮敷天率土哀時對日月耀明威

皇太后宮三大節

南呂
為宮

御宮陞座奏豫平之章曰慈闈福履昌瑞雲承輦獻嘉
祥徽流寶冊光玉食懽心萃萬方旭日正當陽

綏眉壽樂且康瑤池奠葉芳如山阜永無疆

還宮奏履平之章曰璿宮瑞靄霏暉翟山河上袞衣寶
籙慶璇幃萬國懽愉頌德徽長日麗晴暉青鸞
舞鳳在墀康強福祿宜億萬載祝期頤

皇后宮三大節

南呂
為宮

御宮陞座奏淑平之章曰承天地道光嗣徽音兮儷
我皇椒宮壺教彰萬國為儀燕翼昌彤管紀芬
芳春雲渥環珮鏘安貞德有常敷內政應無疆

還宮奏順平之章曰瑤樞煥上台椒殿風和麗景開
晴旭上蓬萊佳氣氤氲徧九垓祥雲護燕祿培
麟趾毓蘭茝雉扇影徘徊看瑞靄集宮槐

一丹陛樂章三大節

御殿羣臣行禮奏慶平之章曰鳳凰在藪麒麟在郊
垌不如國士充陛廷野無遺賢宗有英夙夜在
公在公明明○外藩行禮奏治平之章曰我清
世德作求若天行天盡所覆畀我清萬方悅喜

來饗庭曰予一人業業兢兢○文進士行禮奏
慶平之章曰賢關大啟五緯麗宵光九苞彩鳳
鳴高岡日華五色舜衣裳濟濟蹒蹒多士思皇
○武進士行禮奏慶平之章曰鷹揚鶚薦厲翮
九霄清兔置在野維千城龍韜豹畧蜚英聲肅
肅赴赴王國克生

宮中行禮奏雖平之章曰關雎四教家邦作孚先
黃裳元吉地承天六宮仁順化穆宣麟之趾兮

萬福之原

駕幸盛京羣臣行禮奏慶平之章曰重熙累洽絃瀛
被仁風穆如神孫臨錫豐橋山禮成御故宮零
露漚漚有來雍雍○外藩行禮奏治平之章曰
四方合敬同愛所尊親思木有本水有源東西
朔南咸駿奔純固恪恭日子雲孫

命經畧往討金川經畧行禮奏慶平之章曰金殿晨
開銅龍啟推轂恩隆典儀九重上爭歌喜起敷

聲教盡仰天威○凱旋行禮奏慶平之章曰決
勝從容籌上將師行肆靖遐方宣武畧更敷文
德垂衣治端拱明堂

皇太后宮

皇帝率王公百官行禮奏益平之章曰皇家燕喜福
壽協慈徽千官拜舞萬國瞻依靄璇宮聖日輝

皇后率妃嬪公主福晉命婦行禮奏雖平之章

同前

皇后宮行禮奏正平之章曰正坤維兮儼皇極母儀

昭萬國福履永綏將六宮承法則

一導迎樂章

躬祀

郊

廟禮成

回鑾均奏佑平之章

南郊樂章曰崇德殷薦升燎告虔惟聖能饗至誠天眷

駕六龍臨紫煙佑命申圖錄綿

北郊樂章曰隕爾而靜持載廣生長至修祀聿來光景
富媪愉元德升嶽瀆安民物亨

祈穀樂章曰民者邦本民食乃天爰卜辛日大君殷薦
龍角明祈有年耒耜親天下先

雩祭樂章曰炎夏初屆憫我穡夫爰舉常祀盛樂用雩
明德馨誠意享禾稼登斯樂胥

太廟樂章曰儀若先典追孝在天鴻慶遐邇烈光丕顯
祀事明神貺宣福庶民千萬年

社稷樂章曰分職三大康乂國家平土蕃穀降休中
夏薦吉蠲神不遐遍九垓鴻祉嘉

東郊樂章曰雖肅音送瞰出自東兼燭垂曜與天同
用秩典修皇敬通表瑞輝揚至公

西郊樂章曰殷仲嘗酎華黍若油興穀繁祉受符天
後湧桂華凝彩旂玉燭調千萬秋

帝王廟樂章曰時序羣品端在一欽衣德凝命荷天
之任景軌儀誠既歆肅駿奔顙若臨

文廟樂章曰先聖垂軌千載是祇虔奉師表景行行
止奠兩楹神降之啟後人文在茲

先農樂章曰翩彼桑扈仁氣布和千畝親御百祥膺
荷保介歆種稌多帝手推民樂歌

堂子樂章曰禋祀隆永維統百靈延福儲祉奠安神鼎
修祀祠通紫庭降福祥昭德馨

出師凱旋

堂子樂章曰維文武畧勲業攸崇欽承睿算往征不恭

扇仁風在師中月三捷奏膚功

一慶典均奏禧平之章

視學樂章曰崇聖尊道乾德下交思樂多士化流芹

藻鼓篪徵經術昭聽講環宏育陶

巡狩方岳

車駕出入樂章曰琴麗六飛入蹕出警省方觀民施

惠行慶一人行萬人幸載道歡瞻天聖

元日進表樂章曰元正朝饗臨御萬方閭闔通

啟太平呈象旅貢陳軒樂張徧海隅瞻帝光

長至進表樂章曰黃鐘應律玉琯迴陽書雲薦
瑞迎日履長共球集韶濩張奉金函來萬方

萬壽聖節進表樂章曰神聖文武提挈六符綏以眉
壽罄宜多祐邁斗維呈瑞圖萬歲聲山應呼

皇太后聖壽進表樂章曰昭受天貺鍾慶發祥文母禔
祉福隆尊養錫類蕃慈訓彰億萬年臨壽康

皇后千秋進箋樂章曰坤德柔靜陰教順承螽斯麟

角允維嘉應寶冊鐫天慶膺永嗣徽如月恒

實錄告成進呈樂章曰昭示無垓謨烈聿皇垂布方策

日星輝朗配典墳揚耿光永繹思綏萬邦

玉牒告成進呈樂章曰瓜瓞滋長椒實衍昌公姓千億

福疇維嚮定角仁朱芾皇錫類洪咸樂康

頒時憲書樂章曰欽若誠亶皇正朔頒分秒無忒玉

衡齊貫敬授時宜暑寒穡事明民庶歡

頒詔樂章曰申命重巽綸下九閭句出萌達百昌咸

振象魏懸韶鐸巡德意宣天地春

殿試舉榜樂章曰賢綱寬整才俊畢登疏附先後

一人維聖教澤長多士盈景運開龍虎蒸

耕藉進種稑樂章曰晨作農正鸞輅勸耕種稑嘉種

降康延慶帝藉開農政行我稼同明賜成

親蠶進筐鉤樂章曰戴勝告時西陵肇典爰舉懿筐

爰臨柘館御鞠衣登瑞繭金鉤陳嘉義展

迎叻樂章曰皇作宮殿因地順天如竹苞矣美哉

輪奐鳥翼飛松栢挺芋且寧居萬年

耕藉三十六禾辭光華日月開青陽房星辰正呈農
祥帝念民依重耕桑肇新千藉考典章吉蠲元
辰時日良蒼龍鸞輅臨天閭青壇峙立西南方
犧牲簠簋并芬芳皇心祇敬天容莊黃幕致禮
虔誠將禮成移蹕天田旁土膏沃洽春洋洋黛
犁行地牛服疆司農種穰盛青箱洪縻在手絲
鞭揚率先稼穡為民倡三推一墾制有常五推

九推數遞詳王公卿尹咸贊襄甸人千耦列雁
行耒耨既畢恩澤滂自天集福多豐穰來牟蕎
藿森紫芒華薌赤甲秬稭秠秠三種黎白黃
稷粟堅好碩且香蘼芑大穗盈尺長五菽五豆
充隴場稌粢薺黍九色糧蜀秫玉黍兼東廩烏
禾同收除童梁雙岐合穎遍理疆千箱萬斛收
神倉四時順序百穀昌八區九有富蓋藏歡騰
億兆感聖皇

皇后採桑歌躬耕禮成昭躬桑蠶月吉巳迎辰祥金
華紫闕五翟光瑞雲彩映椒塗黃壇南宿戒帷
宮張西陵展事搖珩璜齋肅恭敬柔雍彰金鉤
綠簾懿宮筐尚功司製奉以將柔條在東涵露
香鞠衣三摘鳴鳩翔月靈臨賁龍精昌黼黻五
色質且良昭事上帝祠蒸嘗儀型宇宙帥妃嬙
衣食滋殖被萬方

一殿庭清樂恭上

皇太后徽號

太和殿

閱

冊寶奏海上蟠桃之章曰海上蟠桃乍熟日邊紅杏初

芳慈幃履慶承天
景福正綿長

一解啟蓬萊排

仙仗露漙漙凝仙掌
祥衣翟服爛明璫
耀金鋪

日擁扶桑喜風和
駘蕩鑪熏百和香
太平有象

孝德光昌

二解

殿當中雲光養駕臨軒金闥敬孝

思不匱重天常展瑤函寶冊輝煌喜風和駘蕩

鑪熏百和香太平有象孝德光昌

解三

紫霞杯葡萄

菊釀九華銓芙蓉析流霞紺雪酌天漿頌期頤

地久天長喜風和駘蕩鑪熏百和香太平有象

孝德光昌

解四

玉衡平金波朗湛露融階蓂長雲

璈法曲奏清商奉慈徽長信傳芳喜風和駘蕩

鑪熏百和香太平有象孝德光昌

解五

萬方玉食

尊親養孝治烝烝天下仰敬歌萬壽無疆

趨

○

大燕進饌奏萬象清寧之章曰萬象清寧海寓承平

瑞日麗彤廷乾主大生坤職資生四序不言而

成宸居端拱敷皇極帝道無為法健行五緯明

百度貞萬邦額手歡慶

解一

軒圖麗日懸金鏡堯

階冀英舒長景陽回叅谷開春令帝車運轉杓

攜柄天道本無言主德惟居敬萬邦咸頌吾皇

聖

解二

歡幸崇洽重熙際太平萬國獻葵誠簪紱

盈庭筐篚充庭圖王會奏咸英微颺不動珠簾

捲露漙漙仙掌高擎酒初馨薦瑤觥共祝一人

有慶

三解

彤墀上花甎布影瑤階上鑪煙細生鳳

凰鳩鵲敞雲屏宮漏消玉壺清

四解

泰階久平大

有屢登上林草木瑞光凝卿雲景星梯航萬國

冠裳整香煙盎盎排蓮井宮殿風微仙樂盈九

重韶箭來儀鳳穆肅天容睟以清

五解

庭燎初炳

仰垂裳一人有慶明離午正又千道彩霞籠瑞

景西山峩峩分翠黛共南山獻壽北斗天漿溟

萍天長地久永茲九野盈寧萬方綏定

六解念世

德承天命況復寶籙鴻圖嘉祥歲歲呈五風十

雨九穗雙岐紫芝朱草榮木華連理更蕪之屈

軼階前指佞

七解

欣慶際昌期觀聖政億萬載培

周鼎宵衣旰食日邁月征殫厥心為民求瘼

莒葉抽時花綻杏寫幽風又思省春省秋省

八解玉

振金聲皇朝功德慶成從此年年獻兕觥佳節

良辰喜交并傾堯酒堯棟雲生壽籙綿綿天共

永趨辭○上元節上燈奏火樹星橋之章曰火樹

星橋爛煌煌銓月連宵夜如晝春風料峭鈞天

奏徹奏徹箭韶煙雲中瑞靄交籠著鮫綃錦繡

叢萬花繚繞魚龍夭矯嵩祝聲高解分明是洞

天是絳霄分明是靈臺靈面靈沼更春光乍到

景物暄妍雨露饒又黃上柳條漏洩青陽在野

橋解賀聖朝世德遙鬱曈曈日麗層霄聖嗣聖

重明繼照萬民歡樂萬方熙皞昇平節瑞應昭

瓊蕊飄蕭寶殿開法曲雲璈魚龍夭矯嵩祝聲

高

解三

金支麝氣飄西吹琉璃四照影娥池鳳燭

燒百子池涎熟龍膏九華鎰篆煙消寒星累累

綴銀霄蟻穿九曲珠光耀好良宵是皇家景福

滔滔

解四

滿山椒花簇百枝嬌月輪正高鎰和月

一片冰霄是皇家景福滔滔

解五

殿當中黼座高

春悄銅壺漫敲笙歌千萬里而遙是皇家景福

滔滔

解六

良宵正好正好良宵看皇都萬井多娛

樂良宵正好正好良宵蓬壺清窈銀海光搖百

和香霏瑤島紫羅囊繡綵飄花匝東風吹飽

同慶清朝

解七

小梅梢暗香浮動淡煙籠罩月上

柔枝露滴輕苞今宵裏巷舞衢歌遍寰瀛同慶

清朝

解八

願春光年年好三五迢迢不夜城銓月

交奉宸歡暮暮朝朝成喬成卿萬朶祥雲護帝

霄

辭趨

耕藉禮成筵燕進饌奏風和日麗之章曰風和日麗

時鳥初喚春晴卓午清隄外一犁春雨玉砌旁

萬年芳樹共慶天田成禮後聖主一游一豫看

零雨桑田疎疎秧馬闌闌村鼓

解

雲開寶殿玉

案初進金盤齊舉蘭英未盈盈翠醕蓬池膾紛

紛細縷玉粒長腰雲子飯來自神倉天庾正樂

奏咸英春旗簇仗塗歌巷舞

二解

吾皇厯念四海

黔首吾胞吾與所無逸九功六府繪幽風築場

治圃一粟一絲民力在信是農家辛苦更問夜

求衣亮功熙績治登三五

三解

勸九歌修六府飭

太史順時覲土禮成樂備堯厨扇薏蒲

趨辭

駕幸翰林院筵燕進饌奏玉署延英之章

譜同萬象清寧

曰

玉署延英環珮葱珩法駕幸蓬瀛龍口琮琤碧

沼澄清壺天一鏡空明廣筵日近祥雲履阿閣

風微寶篆縈象緯呈泰階平儒林額手歡慶

一解

皇心無逸常居敬松軒雲牖勞咨儆深宮遐覽

千秋鏡淵思汲古資修綆唐虞授受親奎壁圖

書炳百年禮樂於斯盛

解二多幸朝野從容際治

平麟閣集簪纓鳳啟雲屏鵠立軒庭徵法曲奏

咸英青袍紅綬相輝映露瀼瀼芳瀉瑤觥瑟黃

流飲大烹共祝一人有慶

解三

小山上參差桂影

梧桐上雖雖鳳鳴尊疊次第沐芳馨早斜日映

簾旌

解四

三都西京鼓吹縱橫五車四庫擷精英

大鳴小鳴柏梁黃竹追高咏仰看五緯駢東井

天獻珍符合睿情何止高陽聚德星

解五

天心籲

俊灼知見宅心三俊自天保定更保佑自天申

景命思皇多士生王國更拔茅連茹多士彙征

並進白駒空谷尚無金玉爾音席珍待聘

六行解

漏永銅烏靜從此書帶芊綿承恩盡向榮五老

遊河堯心光被垂衣文教成萬方矯首喜蜉蝣

蟋蟀氣求聲應

七解

堪慶佩縑囊隨後乘秘書省

龍光炳丹黃點勘削簡汗青勤著述手讐目覽

玉尺冰裁時共凜入承明不須看花影甄影

八解

玉振金聲儒林徧荷殊榮五色雲從畫棟生石
室芸臺有餘清頌聖壽悠久高明學海年年望

幸

趨辭

凱旋

賜燕進饌奏日耀中天之章曰日耀中天慶祝堯年

淑氣正暄妍嫩柳芊綿豔李飄翩遐方永息烽

煙雲峯四起迎宸幄霞綺千里映御筵韜畧宣

羽書傳臣鄰雀躍歡忭

一解

和風麗日祥雲見九

天閭闔開宮殿笙簧酒醴昇平燕勲標麟閣王

猷顯寅亮載周官風動徵堯典干戈再戢民遷

善解二堪羨衛霍功勞相後先樓可上籌邊征罰

斯專步伐寧愆申軍實督戎旃布昭聖武彰天

罰既來庭底用攻堅福如川酒如泉共沐恩波

不淺解三鵠緜統山苞禹甸橈槍掃風調舜絃來

威補入雅詩篇車嘽嘽鼓淵淵解四王師載旋揚

厲無前溫綸鐘鼎姓名鐫安邊定邊天涯靜處

消爭戰蠶叢最鳥道竒功建高捧霞觴北斗連旌

旗柳拂春風暖一點葵心傍日暄

五解

仙人六膳

藉鹽梅分嘗禁鬻玉階舞乍懸日月雙開明雉

扇共歡天意同人意賞九重春色飽聽流鶯百

轉風光滿羨從看香噴金猊花明上苑

六解書漏

迴晴霞絢嗣此作楫為霖台鼎合韋弦雲韶燦

設彩仗森排徵歡物更妍一人有慶定衅藏戈

甲文修武偃

七解

宛戀醉仙桃催曉箭見花外高

旂轉治登上理海宇晏然億萬載兵銷刑措惕

勵精勤資拜獻喜今朝最難忘皇眷天眷

八解贊

化調元方踪周召名賢裒對敷天景福全臨照

恩光應普徧奚止是甲士三千鰲極高擎欣永

奠

超辭

一丹陞清樂

大燕進茶奏海宇昇平日之章曰海宇昇平日景物

雍熙徧乾坤草木樂清時河清海晏麥雙岐麟

遊鳳集枝連理風澹澹日依依正蓬壺年啟奉

天顏有喜金門嶰竹傳仙吹金猊篆裊香煙細

合殿歡聲殷地一統山河萬年天子一解佳氣佳

瑞滿皇畿天門詆蕩御筵披千峰疊嶂排晴翠

動龍蛇日暖旌旗菁蔥玉樹萬年枝燕溫溫玉

祀金墀二解天工四序平分歲皇心惟念小民依

一自農功始祁寒暑雨遍疇咨崇墉櫛比豐樂

成民瑞成民瑞茅檐外簫鼓樂幽詩三解溯當年

深仁厚澤到於今累洽重熙皇心繼述踵前徽

勤宵旰勅惟時惟幾

四解

孝饗吉蠲修祀事奉明

粢于豆于登祝繁禧為民祈聖心無逸天休至

天心賜福聖無為聖無為太平恭己垂裳治

五解

得賢臣襄上理賁千旌連茹彙征至蟬有綏鷺

在墀九苞颺彩映朝曦來集上林枝

六解

民俗恬

熙盈寧婦子康衢黃髮偕兒齒食舊德服新菑

想中天堯舜世鼓腹共遊嬉亦越於茲戴堯天

遵舜軌

七解

重譯來時梯航萬里冠裳玉帛圖王

會於萬載太平基想中天堯舜世鼓腹共遊嬉

亦越於茲戴堯天尊舜軌

八解

皇心和豫陽春似

自萬類光輝盛美四海共傾葵五雲齊獻瑞

趨解

○進酒奏玉殿雲開之章曰玉殿雲開金門春

在蓬壺界日月昭回景福齊天大

一解

乾坤清泰

五雲深處是三台看勾陳北指更闔道南迴明

朗朗左樞兼上相爛熳熒熒龍角枕河魁際中天

珠聯璧合仰紫極廣至鳧來一人有慶萬國春

臺

二府

事修和顓俊才扇仁風徧九垓萬方樂

育仰栽培一人宵旰符真宰幾康劼天工代

民生亦快哉饗殮聖懷勵憂勤保大持盈泰

歌帝力望堯階

三解

香馥馥葡萄發醅天漿泛玉

枯光灑灑露從仙掌開北斗傾萬壽觴南山獻

延壽杯慶玉食萬方來

四解

看蓬瀛春暖林巒間

早梅喜風和日麗年華入睿才況山巔水隈玲

瓏萬卉開綠芊芊
蘇似茵紅灼灼
花如海雨過

也隱隱輕雷

解五

到清和暑風來茂對乘時長景

恢台殿水殿紅紛紛
綠駭曳喧颺楊柳
毵毵

解六金

颺至商序回清秋
皓月揚光彩芙蓉
初日舒蓓

蕾平疇穠稔黃雲
靄歲登大有萬民
歡皇仁優

渥敷天戴

解七

寒雲沍四序該一陽來復天心泰

兕觥醖酒公堂介
豐年蜡饗吹幽賽
乾資美利

本無言帝恩廣運
真無外

解八

天呈瑞愜睿懷金

鏡光輝玉燭和諧鳴鳳雖啗堯棟上雲影徘徊

舜琴中愠為吾民解奏南薰還阜民財冠裳玉

帛圖王會皇風蕩蕩聖德巍巍

解九淵

思往代茅

茨土階不圖不繪黃幄心齋不築崔嵬不重玫

瑰不貴腥羶俎醢却猩唇減豹胎惟寶賢才亦

有鹽梅和舟楫九棘三槐念民依饑渴殷懷願

時和田不污萊神倉御廩藏精稗五風十雨無

借無差

十日

晶熒雲霞鍵奠葉芳生玉階紺露

丹霞接上台帝居深在蓬萊泛瑤觴玉笋雲疊
宮漏銅烏緩緩催頌元首明哉喜君賡臣拜太

平時節萬年杯

趨辭

耕藉禮成筵燕進茶奏喜春光之章曰喜春光將瑞
靄集斗杓運農祥正土脈融平野水泉滋景風
至農夫塗脰長隄柳蠶館條桑映蓑共笠村謳
相永頌元后眉壽萬年育我民四方歡慶一解看
風烏翔玉樹外帝座臨瑤階影百辟趨措笏共

朝天摠衣拜田夫瞻望箭韶奏磬管聲依永寢

園內朱櫻初迸玉井藕十丈移根安期棗似瓜

晶瑩解二是瑤池來閨苑薦世間物如何並嵯雪

甜王母遠相將笑留核冰桃還勝吾皇念菽粟

真民命異物捐芳甘俱屏富方穀在歲有秋勞

則思若時恆性解三辨土宜頒月令遍紫陌野人

望杏玉盤待賜紅垂上苑櫻趨辭○進酒奏雲和

迭奏之章曰雲和迭奏聽倉庚載鳴玉壺清漏

萬井歡娛桑柘陰濃綠樹稠紅牆外柳絲微暎
鴉黃瘦更桃李暄妍晴晝聖天子勞民勸相今

日青轅黛耜芳塋如繡

解一

霞觴獻壽願吾皇萬

年與天齊考玉笋金壘栢葉芳馨綠蟻浮彤墀
下緋衣玉帶兼青綬更父老樞趨在後共慶祝

皇圖鞏固從此五風十雨年年大有

解二

皇心在

宥念春風始和不忘耕耨婦子盈寧宵旰仍懷
饑溺憂深宮內心齋常屏瑤池酒喜天耜既載

黃茂坐廣厦與民同樂但見遐阡邇陌黃童白

叟

三解

芳旨陳金石奏進九醞在廷拜手萬年永

錫稱觥樂有秋

趨辭

駕幸翰林院大燕進茶奏文物京華盛之章

譜同海宇昇平

日曰文物京華盛論道崇儒萃衣冠禮樂在鴻

都木天藻飾舊規模翬飛鳥革何軒翥麟在囿

鳳棲梧牙籤分四庫更芸香辟蠹綺牕青瑣連

朱戶飈輪不隔瀛洲路鈴索丁冬風度條案雍

容鵷行鷺序

解一

欣遇欣遇小春初五雲深處啟

鑾輿鳴鳶風細雲霞曙擁橋門萬歲山呼詞林

曠典古今無汴心源上接唐虞

解二

聖皇自昔需

元輔都俞吁咈矢嘉謨敦學先稽古旁求爰立

夢相符後先疏附左右皆心膂皆心膂如魚水

在藻更依蒲

解三

況我朝雨露涵濡採瓊材並植

天衢承明著作重璫璫欲方駕子雲相如

解四

聖

學高深超遠古得元珠乙夜丹黃性所娛不知

劬琳瑯宛委圖書府赤文綠字德充符德充符

淳龐渾厚登三五

五解

憂球琳鳴枸虛際中天堂

上虞琴撫獻堯尊接舜壺金璫玉膾出仙廚湛

露共沾濡

六解

琬琰天書鸞翔鳳翥羲文奎畫雲

霞護光藻井麗金鋪矢卷阿零露漙漙馬共嚴

徐億萬斯年慶龍光歌燕譽

七解

勛爾簪裾勉思

建樹風雲月露終無取崇實行是真儒矢卷阿

零露漙漙馬共嚴徐億萬斯年慶龍光歌燕譽

八
解翠華臨幸恩光溥重儒術榮生藝圃天祿被

春風石渠沾化雨

趨解

○進酒奏延閣雲濃之章

譜同玉
殿雲開

曰延閣雲濃蘭臺日麗鑾輿泣香泛玻

璃九醞傳仙醴

解一

深嚴丹地高張黼座面南離

看廣庭碧蔭早清露晨晞錦褕綵仗和風度

玉琮琤香階晝漏移光漱灩雲開蓬島霧氤氲

香裊金猊鳳來丹穴鶴在丹墀

二解

雲漢為章際

盛時命冬官斧鑿施雕楹玉鳥煥雲楣采椽不

斷無華侈五經貯腹便竒臨軒集衆思賢才

聖所資慕神仙虛妄誠無謂惟得士致雍熙

三解

啟天祿斯文在茲宵燃太乙藜入承明花甌日

影移覆錦袍蒙春禮徹金蓮歸院遲賜玉贈自

蓮池

四解

緬崆峒問道虛懷謁具茨更金華侍講

流清鑒不疲信鴻逵羽儀通經淺漢韋樂橫汾

燕鎬京歌在藻思行葦咸英奏春酒初醺

五解

集

簪裾燕鳳池柳外輕颺曲沼連漪陋宋主賞花

垂釣笑唐宗結綵評詩

六解

班聯肅樂有儀天池

下逮皆珍味疑甘天酒還如醴御鑪黻黼香煙

細賡歌颺拜萬年歡年年侍奉天顏喜

七解

天顏

喜福履綏太和保合中天世珠聯璧合金垣麗

一心妙衍圖書秘賡歌颺拜萬年歡年年侍奉

天顏喜

八解

玉河東挹清且漣兮斯干既咏不日

成之汲古論思銀榜親題用作士林之氣培其

根達其枝無貳無欺若作和羹為舟楫惟爾攸

資思贊襄日有孜孜亮天工庶績咸熙須將器

識先文藝有為有守汝翼汝為九湛露濃卿雲

麗滿院芝蘭臭味秋水蘼葭寤寐思鶴書時賁

巖隈伴青松商雒仙芝拜手羣歌既醉詩更束

帛安車徧山巔水湄得賢致理聖無為趨辭

凱旋

賜燕進茶奏景運乾坤泰之章曰景運乾坤泰八表

歸懷迅除戎玉壘陣雲開一封箋表達堯階天

顏大霽宣寮案抒壯畧運奇才建膚功奏凱永

牧寧邊界錦江春色消煙靄人工健羨天工代

方叔師干應賽績著旂常榮褒圭玠一指授指

授特宣差何殊吉甫頌平淮運籌帷幄成功快

賀澄清燕啟蓬萊祥光燭煜襲不愚暖融融瑞

氣南來二解歸而飲至垂方策平安火報樂無涯

五服施章彩萬方寧謐陟春臺車書玉帛丕冒

如天大如天大慶酬庸列爵耀三台三解緬嚴冬

旗麾色展喜今春
笳鼓聲諧都緣廟畧聖親裁

移時節掃浮雲浮埃

四解

我武維揚羣虎拜詠良

哉來饗來王互絃埃貢金苔洗兵何必臨魚海

作舟端藉濟川材濟川材還資變理調仙鴈

五解

望前途戈倒載荷包蒙赦宥加寬貸驅獸散叶

鳳咭用過蠻方福孔皆琛贄喜盈階

六解

花雨輕

篩香雲結靄鴻鈞氣轉陽和屆拖杏頰暈桃腮

睽盈筐嘉實采玉案早安排春並恩長暢宸襟

符帝賚

七解

三殿歡諧千官樂愷堯尊舜樂欣重

再知有喜永無猜睭盈筐嘉實米玉案早安排

春並恩長暢宸襟符帝賚

八解

明良遭際光千載

喜振旅歡騰中外駿烈協賡歌鴻猷標史冊

趨辭

○進酒奏聖德誕敷之章曰聖德誕敷皇威遠

布資元輔授鉞前驅蕩定昭神武

一解

旆張巴蜀

臨軒推轂掌兵符便霜戈西指更羽騎南趨威

凜凜先聲馳遠徼顛巍魏撻伐審孤虛仰台垣

權操左相寄專閭星耀中樞濯征咫尺剋捷湏

史

二解

奮武揆文秉聖謨甫臨衝奏捷書耿光揚

烈志何如申明紀律嚴軍伍指揮決勝天威助

風雲八陣圖機宜式範模勵公忠德教忙宣諭

恢覆載宥頑愚

三解

承睿算天兵勦除何愁蜀道

紆卜遄征鷹揚出上都凍日寒雲入棧嚴風勁

雪載塗乘橈走殫勤劬

四解

乍營開細柳溫同挾

續餘凜自天成命聲靈振八區把宵人剪除握

要似摧枯息氛祲
淬戈鋌修文德
陳干羽振士

氣忠信交孚

五解競輸誠悔負
竭面縛來降
釜底

游魚開湯網
遄宣露布慰堯心
不事征誅

六解班

師慶報捷初鳴笳
擗鼓催前部
不驚雞犬咸安

堵威名綽著
追强弩太平一統
萬年歡潜消兵

氣成霖雨

七解和風扇淑景
攄承恩既醉趨
鵷鷺

端資啟沃
聯心膺儲胥
常見風雲護
堂廉一德

慶昇平春光怎及
恩光溥

八解

沾優渥
賜大酺三

爵言言拜錫宮壺饜飫天廚波歛濫湛露涵濡

競稱觥介壽綏多祐好韶華春盎雲衢垂裳有

道開昌宇光移玉盞麗映金鋪

解九

龐洪異數羣

歌樂胥威馳六合位重三孤進獻嘉謨出靖邊

隅允作中朝砥柱企都俞佐唐虞百辟嚴趨殿

陞山呼廡濟濟颺拜歡娛戛鏘鏘依永笙竽萬

斯年玉燭安舒河清海晏金甌固榮生虎竹喜

溢簪裾

解十

日舒長時和煦萬彙從茲昭蘇寶篆

氤氲裊御鑪玉缸香泛醑酥想當年在藻依蒲
鎬燕何曾今昔殊慶槐鼎雲需賡君臣相遇瞳

矐旭日照宸居

趨辭

一部燕

賜衍聖公燕樂奏洙泗發源長之章曰洙泗發源長

麟鳳流芳久春茲後裔克紹箕裘詩書教澤延

禮樂家聲舊茅社長膺天眷厚際端冕凝旒桓

圭章甫彤廷舞蹈時覲春秋

一解詔宗伯使饗人

進羞大道獻酬形虎形鹽訓恭訓儉慈惠兼施
寵錫優勵嘉修素風益懋庶不負皇朝渥澤旨

酒思柔

解二

賜文進士燕樂奏啟天門之章曰啟天門日麗黃金

榜趁驂騑緩步青雲上論聖賢事業無涯量況

生平溫飽何曾望念鰥生叨渥澤天來廣雖持

寸草心莫報君恩蕩涓埃矢竭酬天貺

解一玳筵

內金壺玉漿月臺上絲竹鏗鏘繼自今木天清

敬增泰巖不辭土壤

解二

賜武進士燕樂奏和氣洽之章曰和氣洽泰階平皇

威截烽煙靖念兔置亦有干城虎頭猿臂交相

慶看鷗翮秋來勁

解

須知道羽扇綸巾還有那

弓強箭勁更兼之武庫縱橫効折衝驍驍騁執

戈爰衛羽林備公侯腹心

解二

一鄉飲酒

御製南陔由庚詩

南陔章曰我逝南陔言陟其岵昔我行役瞻望有
父欲養無由風木何補○我逝南陔言陟其屺今
我行役瞻望有母母也倚廬歸則寧止○南陔有
筍簴實勺之孱孱孩提孰噢咻之○慎爾溫清潔
爾旨肴今爾不養日月其惱

由庚章曰王庚便便東西朔南六符調燮八風節
宣○王庚容容朔南西東維敬與勤百王道同○
王庚廊廊東西南朔先憂而憂後樂而樂○王庚

恢恢南朔東西皇極孰建惟德之依

一慶隆舞樂章

於鑠皇清受命於天光延鴻祚億萬斯年天開
令節瑞啟階蓂共球萬國聖壽千齡粵自我先
肇基俄朶長白之山鵲銜朱果綿綿瓜瓞長發
其祥篤生列祖積慶重光式廓舊疆東訖海表
聖聖相承永世克紹

右第一章

赫赫神功龍飛崛起戎甲十三奮迹伊始復讐
靖難首克圖倫天戈一指震懾強鄰九姓潛侵
滅跡如掃蒙古五部來奉大號明師四路五日
而殲定鼎遼瀋都城巖巖陣雲五色江冰夜凝
天助有德應運而興

右第二章

天亶聰明覆幬下國遠服邇歸誕敷文德四方
來附雲集景從建長命官庶職是綜爰創國書

頡文義畫聲協元音萬古不易爰定軍制綵旒
央央或純或間永奠八方締造鴻模創成大業
錫福無疆慶鍾千葉

右第三章

佑啟哲嗣光闡前猷昭宗駿德誕迓天庥攜貳
綏懷朝鮮歸欵世奉東藩釐爾圭瓚三十五部
厥角稱臣西被佛土重譯來賓濯征有明耀師
齊魯電掃郊圻有而弗取畧地松杏屢殪敵軍

百戰百克用集大勲

右第四章

帝德廣運昭受鴻名建國紀元永定大清敦睦
九族彝倫式叙尚德親賢股肱心膂三館是闢
鑑古崇儒郊社禘嘗式賁皇圖爵秩以班六曹
承政百工永釐萬邦表正威鑠函夏德配蒼穹
敬承無斁駿烈豐功

右第五章

帝授神器統一寰瀛剪滅巨寇乾坤載清一著
戎衣若雨甘雨大告武成作神人主躬親大政
飭紀整綱制禮作樂昭示典常納諫任賢慎微
慮遠定律省刑萬世垂憲克勤克儉忠厚開基
景命維新兢業自持

右第六章

聖神建極道冠百王六十一年福祚久長天縱
聰明沖齡御宇孝奉兩宮德隆千古三孽蠢動

一舉蕩平海氛永靖浪息長鯨親御六師三征
沙漠威肅惠懷鋤頑撫弱禹功底績虞典時巡
敷天率土莫不尊親

右第七章

惟天行健神聖則之典學勤政作君作師無逸
為箴宵衣旰食一人憂勞綏此萬國文經武緯
地平天成中和立極玉振金聲億萬斯年觀光
揚烈敬天勤民體元作哲天鑒孔彰翼翼後王

儀型皇祖帝祚遐昌

右第八章

瑤圖炳煥六合雍熙星輝雲爛風雨以時翕受
嘉祥調和玉燭治靄皇風道光帝錄東漸西被
北燮南諧梯航琛賁致堯階日升月恒萬邦
蒙福擊壤歌衢嵩呼華祝秩秩盛儀洋洋頌聲
紹休列祖永慶昇平

右第九章

一
駕幸

盛京大燕

御製世德舞樂章曰粵昔造清匪人伊天天女降思
長白閨門是生我祖我弗敢名乃繼乃承逮我元
孫

右第一章

元孫累葉維祖之思我西云來我心東依歷茲故

土仰朔始謀皇澗過澗締此丕基

右第二章

於赫太祖肇命興京哈達輝發數渝厥盟如龍田
見有虎風生戎甲十三王業以興

右第三章

爰度爰遷拓此瀋陽方城周池太室明堂不寧不
靈匪居匪康事異放桀何心底商

右第四章

丕承太宗允揚前烈倬彼松山明戈耀雪以寡敵
衆杵漂流血惜無故老為余詳說

右第五章

余來故邦瞻仰橋山慰我追思夢寐之間崇政清
寧載啟南軒華而不侈鞏哉孔安

右第六章

維我祖宗欽天敬神執豕酌匏咸秩無文惟慢再
張尊俎重陳弗渝弗替遵我先民

右第七章

先民宅茲載色載笑今我来思聖日俯照爵我周
親蓋臣並召亦有嘉賓歡言同樂

右第八章

懿茲東土允惟天府土厚水深周原膴膴南陽父
老於是道古有登其歌有升其舞

右第九章

我歌既奏我舞亦陳故家遺俗曷敢弗因渾灝淳

休被於無垠勿替引之告我後人

右第十章

一德勝舞樂章曰乾隆聖世瀛寓又康元首惟
明股肱惟良景運鴻昌休德茂著統馭八埏惠
液遐布金川小醜蠢爾寘頑惟時弗率跳梁窮
邊用申天討聲罪執言長驅驛駕油雲斯屯聖
謨廣運決機萬里聿簡賢臣良弼是倚曰忠曰
勇經畧戎功心堅金石誠格蒼穹身先烝徒跋

履巖阻晨夕盡瘁均勞共苦姦宄是殛逆謀是
攘國憲孔昭我武孔揚窟穴犁止岩巢圯止堅
卡墮止峻礪毀止爰褫其魄爰喪其膽震懾股
栗潛伏於坎如鼠竄穴如鱗遊釜號呼哀籲再
三求撫元臣執義憤欲蕩除帝德好生曰免駢
誅六條攸約虔慄遵循恩綸祇奉解網施仁丕
革厥心匍匐奔赴除道築壇香雲擁路帝仁覃
敷六合滂洋蘇其枯朽賜以再生展也滿兵彌

月功成云何其速皇猷是憑神功炳焯乾坤軒
豁九重勝算明並日月勒諸琬琰昭諸汗青禮
成鉅典樂奏昇平膚功克奏慶筵是侑太和氤
氲翔洽宇宙卿雲糾縵景緯珠聯梯航琛賁億
萬斯年

一笳吹樂章

牧馬歌

人君之樂恃此紀綱兆民之樂恃我君王室家

孔宜夫君之力朋友有成和輯之德

古歌

八種成壞兮實人世之常墮迷網中兮慾鎖與
情韁愚人無識兮樂茲殊未央執空為有兮謬
語其奚當

如意寶

不滌心於羣經具本性而無明不服膺於佛乘
說妙行而聽熒

佳兆

一人首出萬國尊親湛恩汪濊普被生民百花
敷榮一日悅目濯頂寶光萬衆所伏

誠感辭

良胡畏哉襄以至誠良胡過哉竭已所能良胡
偽哉語無文飾良胡怠哉罔敢休息

吉慶篇

有君聖明逾戴天有臣靖共勝後嗣健婦持家

過丈夫如意寶珠惟孝子

肖者吟

滅除已罪仗佛真言如欲療病惟良藥存菩提
鐙今出衆生於黑暗智慧梳今櫛六慾之糾纏

君馬黃

大海之水不可量天府寶藏奚渠央良朋和睦
益無方聖有謨訓垂無疆

懿德吟

人君能仁蒸黎之父君子和平羣相肺附懿厥
哲人實維師傅匿智懷私乃民之蠹

善哉行

惟安惟和心意所欲無貳無虞朋友式穀

樂土謠

分人以財惠莫大焉施人以慧寧不踰旃

踏搖娘

日將出兮明星煌煌壽斯徵兮秀眉其龐三十

卷一百
維壯五十遲暮莫親祖母莫尊祖父

頌禱辭

我馬蹀躞行如流水雋英滿座交親悅喜族黨
嫺姪咸富且貴酌酒為歡既多且旨

慢歌

十五歡娛八十衰壯容華茂遲暮悲祖妣最親
祖尊哉

唐公主

導王之路兮憇尤希素位而行兮夫奚疑

升誠曲

罔有敗事兮遵道而行長無離析兮順親之情

明光曲

瞻彼日月虛空發光聖君聖母焜耀萬邦

吉祥師

日月之明兮容光必照聖君之明兮蒸黎咸造

聖明時

際聖明時良我福只橫被恩澤良我祿只

微言

倏忽變遷順其自然如彼蜃樓余生渺焉

際嘉平

諸惡莫作菩提薩多瞋瞋妄行用墮三塗

善政歌

經何本本於宗身何本媼與翁罪何本嗔熾熾

福何本和雍雍

長命辭

靡言不適於道兮水萬派而朝宗夫惟外道之
妄語兮井自畫而不通

窈窕娘

惴惴原獸思全其身競競庶士思庇後昆

湛露

維彼愚人惟知己身維此哲人心周萬民

四賢吟

六欲相牽微生是戀嘆彼駒光如夢如電

賀聖朝

慈悲方便永斷疑情極樂淨土不滅不生

英流行

知之而作分明哲所由不知而作今庸愚之儔
慮而後動今卓彼先覺率而妄動今是乃下流
堅固子

馬蹀躞分身不獲康念此身今本自無常馬騰

驤兮生不獲寧念此生兮本自無生

月圓

良馬之德於田可徵良朋之行相交乃明

緩歌

良馬云何乘者所思良朋云何久而敬之

至純辭

惟帝力兮勞來父母力兮免懷乘騏驎兮馳驟

仗巨擘兮弓開

美封君

貢高專美曰惟不仁擁貨自厚不久四分惟不
惺惺乃不戒懼凶心常萌誰與共處

少年行

嗟棄捐於巖穴兮盍遠播夫芳聲嗟終老於草
莽兮盍永垂夫令名

四天生吟

悲哉北邙令聞宜揚北邙悲歟青史不渝

宛轉辭

瞻彼中林
芄芃萬木
旃檀有香
生是使獨
萬類咸若
攘攘芸芸
民之父母
首出一人

鐵驪

載飛載翔
惟翮是憑
為聲為律
惟心是經
射之能中
惟指是憑
交之能善
惟和是恒

木樨珠

穀之成雖
兮孚化之
功羽用為
儀兮賦命
之隆

迪彼愚蒙兮惟聖之功明厥本性兮實在己躬

好合曲

維勤斯哲安不可懷溺茲小樂至樂難期

童阜

乾照無私聖教無類謨訓洋洋鑒斯不昧

天馬吟

騏驎不羣蹇驢鴻鵠不偕斥鷃騶虞不邇狐狸

聖哲不昵愚賤

大龍馬吟

疇知幻軀秘此佛性疇不退轉佛恩來證上德
隨落疇其知病下士頓超疇其知競

始條理

福慧天亶誠哉難覲通人達士豈奚易返

追風赭馬

葱兮蒨兮山有芳蘭儻兮祁兮首有妙鬘

迴波辭

元首明哉首出股肱良哉罕匹賢夾輔兮王室
莫執左道兮姦賊

長豫

景行行止下民堪憐宜汎愛衆毋逆忠言

平調

騏驎適我體橐鞬衛我身嘉言資我道經史沃
我心

遊子吟

升彼高阜兮思我故鄉有懷二人兮莫出戶堂
陟彼崔嵬兮思我故鄉有懷二人兮莫出垣牆

平調曲

帝王無逸天地和寧辟公膚敏兆民阜成

高士吟

日之升天為經民之行君為程水之流隨坎盈
牝之游駒之情

哉生明

非冒於貨賄也感兄弟之敬心非貪於飲食也
感父老之誠忱

高哉行

云何致太平
峯然望皇衢
人生夫何常
善保千金軀
民之不能忘
令名照神區
子孫振繩繩
百千萬億餘

三章

敬遵佛勅如茲甘雨莫行邪惡種茲罪苦

圓音

身無常花到秋名無常雷不留財無常蜂釀蜜
業無常海發漚

闌杆

賢者斯賢賢不賢不賢賢蜜蜂見花駐蜻蜓去

翩翩

思哉行

千金寶馬不如先人之弊遺嘗盡諸果不如母

乳之甘兮

法座引

電可畏兮時屆朱明霜可畏兮五穀將登禍可
畏兮歡樂所成罔不可畏兮憶神魂之初降生
接引辭

火宅無清涼苦塗無安樂烏路誰能攜閣浮難
駐脚

化導辭

閭浮提界如彼高山越之維艱盡却今時大海
漫漫欲渡良難

七寶鞍

瞻彼隄岸水則不濫有君牧民當無畔散飛鳥
雖疲寧甘墮地君子固窮之死不二

短歌

嗟余生之歡樂兮似黃離之盈尺感韶光之荏
苒兮似葉上之青色及芳華之當齒兮且喜樂

以永日

夕照

時乎時乎時外無時時其逝矣奚與樂為黃離
既是定少溫暾天光既暮暄暄其陰

歸國謠

皇矣聖世藹如仁君懷哉懷哉日遠日分亦有
良朋如兄如弟日遠日離能不遙跂

僧寶吟

投誠皈命即安且吉如佛塔廟云胡遠別和樂
且耽手足提攜如姊如娣云胡遠離

婆羅門引

酪必成醐父將成祖沙必成邱母將成姬

三部落

試觀三界漚起漚滅如彼秋雲乍興乍沒

五部落

流水何湯湯吾生如是遊雖有聖賢人誰能少

滯留

一番部合奏樂章

大合曲

元綽是依明神是祇一心至誠昭事勤只巍巍
大君永底蒸民中心愛戴稽首來臣念人生之
無常兮合勤修夫善行信百行之咸善兮終和
平而神聽

染絲曲

大君至聖教敷率土敕寧萬邦拜跪奉主

公奠

丕顯元后惠懷萬方國彥棐恭協贊邦常率土
之濱誠意溥將咸拜稽首依戴聖皇

雅政辭

皇皇聖明無遠弗燭林林衆庶無思不服元化
惠心為善去惡聖人之邦長生永樂


鳳凰鳴

承乾體元惟我聖君光開草昧惟我聖君綱紀
庶政惟我聖君父母萬國惟我聖君惟我聖君
兮覆幬如天惟我聖君兮自新新民惟我聖君
兮中外乂安惟我聖君兮羣慝消淪拜手稽首
兮頌溢兆民

乘驛使

大地茫茫大海滄滄豈伊無寶求之奚方自古
在昔為君為王膺圖御宇命不予常實心實政

惠此萬邦聖御大寶
繫惟我皇繫惟我皇
疇可與之頡頏



欽定大清會典則例卷一百